

## Sommaire

1. Ouverture de la séance publique
  - M. le Président
2. 6529 - Débat d'orientation sur le rapport d'activité de la Médiateure (2011-2012)  
6634 - Débat d'orientation sur le rapport d'activité de la Médiateure 2013
  - Rapport de la Commission des Pétitions (rapport d'activité de la Médiateure 2011-2012): M. Marcel Oberweis
  - Rapport de la Commission des Pétitions (rapport d'activité de la Médiateure 2013): M. Marco Schank
  - Débat: M. Félix Eischen, M. Marc Angel, M. Guy Arendt, M. Roberto Traversini, M. Gast Gibéryen, M. Justin Turpel
  - Prise de position du Gouvernement: M. Dan Kersch, Ministre de la Fonction publique et de la Réforme administrative

Au banc du Gouvernement se trouvent: M. Xavier Bettel, Premier Ministre, Ministre d'État; MM. Romain Schneider, Nicolas Schmit, Mme Lydia Mutsch et M. Dan Kersch, Ministres.

**(Début de la séance publique à 14.05 heures)**

### 1. Ouverture de la séance publique

► **M. le Président.**- Eis Sëtzung ass op.

Huet d'Regierung Kommunikatiounen ze maachen, Här Statsminister?

► **M. Xavier Bettel**, Premier Ministre, Ministre d'État.- Neen, Här President.

► **M. le Président.**- Merci villmools. Ech wollt just dervu profitéieren, fir d'Chamber ze informéieren, dass, wann de Statsminister kuerz viru véier Auer de Sall verléisst, dat net aus Netrespekt virum Parlament ass, mä well e vum Statschef fir eng Entrevue, fir eng Audienz gefrot ginn ass. Merci fir d'Versteesdemech.

Da géife mer elo direkt zum Ordre du jour an zu eiser Orientéierungsdebatt iwwert d'Aktivitéitsrapporte vun de Médiateuren - Ombudsmann, Ombudsfra - vun de Joren 2011 bis 2013 iwwergoen. D'Riedezeit ass nom Modell 2 festgeluecht, an ech ginn direkt dem Rapporteur, dem honorabelen Här Marcel Oberweis, d'Wuert. Här Oberweis, et ass un lech.

### 2. 6529 - Débat d'orientation sur le rapport d'activité de la Médiateure (2011-2012)

#### 6634 - Débat d'orientation sur le rapport d'activité de la Médiateure 2013

**Rapport de la Commission des Pétitions (rapport d'activité de la Médiateure 2011-2012)**

► **M. Marcel Oberweis** (CSV), rapporteur.- Gudde Mëtteg, Här President, Dir Dammen an Dir Hären, Här Premierminister, Dir Häre Ministere, d'Gesetz vum 22. August 2003 huet d'Fonction vum Médiateur hei am Land an d'Liewe geruff. Den Här Marc Fischbach huet als éischte Médiateur dës Aufgab iwwerholl. An deenen aacht Joer huet hien dës Institution mat vill Begeeschterung weiderbruecht. D'Madame Lydie Err ass den 1. Februar 2012 seng Nofolgerin ginn. An hirem éischte Rapport konnt ee gesinn, dass si den ageschloene Mëttelwee tëschent de Bierger an den éffentleche Verwaltung weidergefëiert huet. Si huet och de Kontakt mat de Ministère an de Gemengen net ofgebrach, fir Léisunge bei Problemer ze fannen.

Erlaabt mir awer am Ufank vun dëser Interventioun, lech ze soen, dass de schrëftleche Rapport vun dësem éischte Rapport vun dem honorabelen André Bauler verfaasst gouf. Ënnert der viregter Regierung wor hien zum Rapporteur an der Petitiounskommission genannt ginn. De Rapport huet deemools awer nach net hei am Plenum ugeholl kënne ginn. No de Wahlen, wéi Der wësst, gouf ech dunn zum Rapporteur vun dem Aktivitéitsrapport 2011-2012 vum Médiateur bestëmmt. Duerfir mäi Merci un den André Bauler fir déi gutt Viraarbecht, op där ech konnt schaffen.

► **Plusieurs voix.**- Très bien!

► **M. Marcel Oberweis** (CSV), rapporteur.- E puer statistesch Donnéeën: Tëschent dem 1. Oktober 2011 an dem leschten Dezember 2012, bannent 15 Méint Aktivitéite vun deenen

zwee Médiateuren, sinn 1.059 Reklamatiounen agereecht ginn. 803 Dossiere sinn ofgeschloss ginn an nach 256 waren der deemools en cours. Bei den ofgeschlossenen Dossieren ergëtt sech folgende Bilan: Knapp 40% sinn als net berechtegt Reklamatiounen klasséiert ginn. 12% si vun de Leit selwer zrëckgezu ginn. 7% kruten an hirem Dossier keng Korrektioun. 7% hunn eng partiell Korrektioun kritt. An 22 hunn eng komplett Korrektioun erfuer. 6% goufen als irrecevabel betruucht a 6% sinn awer refuséiert ginn.

Bal 3.000 Leit hu beim Sekretariat vum Médiateur fir Renseignementer nogefrot. Dës Zuele bewisen, dass de Médiateur de Leit mëttlerweil e Begrëff ass an dass hie vun hinne ganz staark sollicitéiert gëtt.

Op där enger Säit ginn de Bierger hir Kloe gelauschtert an op där anerer Säit gëtt versicht, bei de Verwaltungen déi néideg Antwerten ze kréien, soudass d'Bierger méi Vertrauen an de Fonctionnement vum Stat an de Gemenge kréien.

Am Rapport steet, dass d'Zesummenaarbecht tëscht dem Sekretariat an der Direction de l'Immigration ganz gutt ass. Hei kommen Demandé vu Persounen entre autres aus afrikanesche Länner eran, déi hire Pass wëlle verlängert kréien. De Médiateur huet recommandéiert, d'Kompetenze fir déi Ausweispabeieren an d'Direction de l'Immigration ze iwwerdreen, déi schonn iwwert déi komplett Dossiere verfügt, well d'Kompetenz läit nämlech am Bureau des passeports, visas a Légalisatiounen. Dësen Transfert muss iwwer e legislative Wee gemaach ginn.

Vu dass et net ëmmer de betraffene Mënsche méiglech ass, an hirem Heemechtsland e biometresche Pass ze kréien, versicht dann dës Direktioun, hinnen eng Autorisatioun ze ginn. Dëst geet awer just nëmmen dann, wann d'Identitéit vun der Persoun duerch en anert Dokument beluecht ka ginn.

Un de Médiateur gouf eng Klo géintiwuer dem Service des Sites et Monuments nationaux eragereecht, an dat wéinst de Subventiounen bei Renovierungsarbeiten u Gebaier. D'Demande de subventions ass eréischt Wochen no de Reparationsarbeiten eragereecht ginn a gouf deemno vum Service ofgelehnt, well deen déi Aarbechten net reglementsméisseg suiveiere konnt. De Service muss sech hei un de gesetzleche Kader halen. Den Direkter huet an der parlamentarescher Kommission matgedeelt, dass den Internetsite vun der Verwaltung ganz kloer wier an et einfach wier, déi entsprecheend Formulaires ze fannen a se och auszufüllen. Et gëtt deemno keng wierklech Excuse, d'Demande net mat Zäiten eranzeschécken.

Des Weidere gouf de Médiateur wéinst dem exzessiv luese Behandele vun Dossiere bei de finanziellen Hëllef am Émweltberäich befaasst. Dës Situatioun hat sech laut dem deemolege Minister awer verbessert an hien huet drop higewisen, dass de Malaise duerch de Mangel u Personal bedéngt war. Et muss een awer soen: 14.000 Dossiere si vum 1. Januar bis zum leschten Dezember am Joer 2012 eragereecht ginn, an trotzdeem si weider 18.600 Dossiere während där Zäit traitéiert ginn. Dir gesitt also, dass awer do vill Aarbecht geleescht gëtt.

De Médiateur huet drop higewisen, dass d'Demandeure méintelaang keng Äntwert kruten.

Een Accusé de réception ass awer un d'Demandeure geschéckt ginn. D'Memberen an der Nothaltegeektskommission wore sech awer eens, dass all Demandeur direkt muss Bescheid gesot kréien, wa säin Dossier net komplett wier.

De Problem war haaptsächlech bei der Sanéierung vu Gebaier, well dat eng extra speziell Matière ass, an oft feelen Dokumenter, fir den Dossier ofzeschleissen. Et ass dofir fir d'Verwaltung net ëmmer einfach, Entscheedungen dann ze huelen. Eng Persoun gouf doropshin am Accueil téléphonique agestallt an déi kann dann déi Froe beäntweren a kann de Leit dann hëllef, soudass dann de Suivi méi schnell ka gemaach ginn.

De Médiateur huet och drop higewisen, dass och d'Wärmepompele vum Typ Évaporation directe an de Regime vun de finanziellen Aiden am Sënn vun der Promotioun fir déi méi effizient Energienotzung an den Asaz vun erneuerbaren Energien agebonne sollt ginn. Dës Demandé waren effektiv en suspens gehale ginn, well d'Verwaltung drop gewaart huet, bis de Règlement grand-ducal adaptéiert gouf.

De Médiateur huet ënnerstrach, dass hien a munche Fäll keng Kompetenzen huet, well et sech ëm privat Strukturen handelt, wann em eng Fro eragereecht gëtt. Et gëtt Patienten, déi sech iwwer eng schlecht Gesondheitsbetreuung an enger privater Klinik un de Médiateur richte wëllen. Och wann déi dann en éffentleche Service am Gesondheitswiesen ubitt, ka sech de Médiateur net aklénken.

Déi zoustänneg parlamentaresch Kommission war der Meenung awer, et misst een eng virsiichteg Approche hei hunn. Hei kéinten nämlech Betriber, déi dem Contrôle vum Médiateur ënnerworf sinn, par rapport zu aneren, déi déi Contrainten net hunn, diskriminéiert ginn. Et géifen och Schwieregkeete beim Secret professionnel et commercial. Hei hätt de Médiateur nämlech Zougrëfsrechter op Donnéeën, déi awer berufflech geheim misste bleiwen.

Här President, ech wëll op een Dossier agoen, iwwert deen och haut nach vill geschwat gëtt: déi finanziell Ënnerstëtze fir Studenten. Vill Kloe sinn deemools an deem Dossier erabruucht ginn an notament vun de Frontaliere, déi keng Bourse accordéiert kruten, engersäits wéinst dem Questionnaire, fir déi Hëllef unzefroen, an anersäits wéinst dem Critère de mobilité. De Lëtzebuerger Stat war jo deemools vum Europäesche Gerichtshaff veruertheelt ginn.

Doropshin huet déi viregt Héichschoulministesch, déi dee schwierigen Dossier geierft hat, déi néideg Ännerungen erabruucht, fir deem Uerteel dach tant soit peu Rechnung ze droen. Dat war allerdéngs eng Noutléisung, wéi mir haut wëssen.

Am Rapport vum Médiateur konnt ee liesen, dass de CEDIES ronn 15.000 Dossieren traitéiert huet. Fir dat akademesch Joer 2011-2012 goufe 579 ugefroten Hëllef net accordéiert. Dat si genau 3,87% - also net esou vill, wéi ëmmer an der Welt do ronderëm zirkuéliert.

De Médiateur ass nach an engem anere Fall intervenéiert: an der Formation vun den Assistants sociaux. Hei mussen déi jonk Leit ee Stage durchféieren a si kréie keng finanziell Hëllef, kee Kannergeld oder soss eng sozial Ofdeckung vum Stat ugebueden, esou wéi dat de Fall bei de Studenten am Normalfall ass.

En Accord ass fir de Joergang 2010-2011 mat dem zoustännegen Ministère fonnt ginn. D'Studenten hunn eng Indemnitéit kritt, déi dem Kannergeld entsprach huet. Et wor awer och eng Iwwergangsléisung fir d'Joer 2011-2012 gesicht ginn. Mëttlerweil ass dat véiert Formationsjoer, dat fir deen Diplom gebraucht gëtt, gestrach ginn. D'Gesetz vum 19. Juni 2009 regelt elo den Accès zu dëse Beruffer.

Déi auslännesch Diplomer am Beräich vun der Assistance sociale mussen zu Lëtzebuerg duerch eng Prozedur goen, déi awer zwou Etappe virgesäit: éischstens, d'Reconnaissance vun dem Diplom selwer, an zweetens, eng Demande, fir de Beruff selwer auszeüben.

Déi Studenten, déi am Juni 2012 am Bachelor fir Sciences éducatives et sociales op der Lëtzebuerger Uni ageschriwwen waren an déi en Accès fir de Beruff vum Assistant social wollte kréien, konnten doropshin ee siwent Semester durchféieren, soudass si déi néideg Qualifikatiounen kritt hunn, fir de Beruff auszeüben. Mëttlerweil awer ass de Studieprogramm iwwerschafft ginn an de Problem ass ganz geléist.

E puer Dossieren aus dem Ministère vun der Famill, Jugend- a Chancëgläichheet. De Médiateur mengt, dass hie fir spezifesch Missiounen - d'Rechter vun den handicapéierte Leit -, an déi zimlech technescher Natur sinn, net déi néideg Kompetenzen hätt. Hie kann och net agräifen, wann eng Plainte vu behënnerte Leit géint iwwer enger privater Struktur kënnt, och wann dës en éffentleche Service ubitt.

De Médiateur schléisst sech dem Avis vum Statsrot wéi och der Commission consultative des Droits de l'Homme un. Dës Missiounen sollten dem Centre pour l'égalité de traitement uvertraut ginn. Dëst awer ënnert der Bedéngung, dass een där Struktur och déi néideg Moyenen zur Verfügung stelle géif.

D'Verfassungskommission huet dozou op d'Gesetz vum 28. Juli 2011 higewisen, an do steet ze liesen: De Médiateur ka vu jiddwer Persoun mat engem Handicap saisiéiert ginn, wann déi mengt, hir garantiéiert Rechte a Fräiheete géifen net respektéiert ginn.

Déiselwecht Kommission gesäit och e Widder-sproch mat den Aussoe vum Médiateur, wann deen engersäits seet, dass sech de Médiateur net an technesch Beräicher amëschen dierf an anerersäits proposéiert, d'Kompetenze vun him selwer ze erweideren. Virun allem ass hei de Gesondheitssektor betraff an deen ass jo, wéi mer alleguer wëssen, vun äusserst technescher Natur.

D'Institutionskommission seet des Weideren, dass d'Commission consultative des Droits de l'Homme déi eenzeg Lëtzebuerger Institution um internationale Plang ass, déi de Statut A vum Comité international de coordination des institutions nationales pour la promotion et la protection des droits de l'Homme akkreditéiert krut. Eng national Institution, déi an der Protektioun wéi och an der Promotioun vum Mënscherecht engagéiert ass, muss e kloert Mandat hunn an dat muss an engem Gesetzestext festgeluecht ginn. Hei misst deemno d'Gesetz iwwert de Médiateur an deem Sënn modifizéiert ginn, wann deen déi nei Kompetenz sollt kréien.

Eng Kompetenzerweiderung vum Médiateur an deem Beräich bréngt awer eng ganz Rei Froe mat sech, notament wat d'Protektioun an d'Promotioun vun de Mënscherechter ugeet. Doriwuer gouf d'Fro vun enger besserer Koordinatioun tëschent allen Organisatiounen, déi sech fir d'Mënscherechter setzen, opgeworf. An do muss nach da gesot ginn: Affaire à suivre.

Här President, Dir Dammen an Dir Hären, d'Madame Médiateure huet och en Ännerungsvorschlag fir hir Denominatioun vun der Institution vum Médiateur gemaach. Si huet gemengt, dass den Term „Médiateur“ zu Verwirrung kéint féieren. Et muss awer hei en Ënnerscheid gemaach ginn tëschent engem Médiateur civil, bei deem et virun allem ëm Konflikter tëschent Privatpersounen an zivile wéi och kommerzielle Fäll geet, an engem Médiateur institutionnel oder public, wéi mir en hei kennen.

De Begrëff „Médiateur“ géif och net de geneeë Missiounen entsprechen, wéi se am Gesetz vum 22. August 2003 festgehal goufen, esou d'Madame Médiateure an hirem Rapport. Si schléit dofir d'Denominatioun „Ombudsmédiateur“ vir. Och wann déi kompetent parlamentaresch Kommission déi Konfusioun duerch aus versteet an och dréit, da wëllt si awer, dass dës Fro an de jeeweilege Fraktiounen diskutéiert gëtt, well déi awer vu staark politescher Natur ass.

Dozou nach déi folgend Iwwerleeungen zur Erweiterung vun de Kompetenzen: Et ass a verschiddenen Domänen effektiv problematesch, fir anzegräifen, wann et sech ëm privat Strukturen, wéi zum Beispill Spideeler, handelt, obschonn déi, wéi gesot, éffentlech Servicer ubidden.

Wie ka sech dann, wann dës Institution d'Kompetenz net huet, de Kloe vun de Matbierger unhuelen? De Médiateur dierf sech engem Dossier awer unhuelen, deen aus dem Centre hospitalier kënnt. Dat dierf en awer net, wann zum Beispill d'Plainte aus der Klinik vum Kierchberg géif kommen, well déi jo privat gemanagt gëtt. Trotzdeem ass de Service plus ou moins deeselwechten a steet alle Bierger hei am Land fräi.





Och hei huet déi zoustänneg Kommissioun hir Positioun matgedeelt. Si ass der Meenung, dass an engem Fall, wou dem Médiateur och d'Méiglechkeet zougestane gëtt, a private Strukturen ze intervenéieren, déi hirersäits ëffentlech Leeschtungen ubidden, ee fir d'Éischt eng ganz kloer Definitioum vun dem Term „Service public“ ausschaffe muss. Déi Definitioum muss awer vu jiddwerengem gedroe ginn a mat jiddwerengem ausdiskutéiert ginn, ier eng Gesetzesännerung iwwert d'Kompetenzfelder vum Médiateur gemaach ka ginn.

An deem Zesammenhang ass och vun Interesse, den Origine vum Ombudsmann kuerz eng Kéier ze erwähnen, wéi den a Schweden deemools agesat ginn ass. Deen ass do am fréien 19. Jorhonnert agefouert ginn an den huet de Pouvoir d'auto-saisine. Dat heescht, den Ombudsmann ka selwer Initiativen ergräifen.

Eis Kommissioun vun der Verfassung wor awer der Meenung, wa mer dem Médiateur de Pouvoir d'auto-saisine wëllen zouweisen, dann awer nëmmen ënner bestëmmte Konditiounen. An zwar dierf dee Médiateur esou eng Auto-saisine nëmmen dann ergräifen, wann déi concernéiert Persoun hiren Accord gëtt a se averstanen ass, dass de Médiateur eng Enquête iwwer e Service oder eng Verwaltung mécht.

Här President, d'Madame Médiatrice huet mat hire Services och Dossierer aus dem Beräich vun den Aides au logement traitéiert. Hei gouf et e puer Reklamatiounen iwwert d'Justificatif, déi en Demandeur ofzeliwweren hat. De Service vun den Aides am Logement hëlleft nämlech de betroffene Leit beim Ausfülle vun den Zertifikater. De Service sicht och proaktiv no strukturelle Léisungen, fir den uleiende Problemer esou gutt wéi méiglech aus dem Wee ze goen.

De Service huet dofir virgeschloen, d'Recht ze kréien, fir selwer Donnéeën vun de verschiddene Verwaltungen anzefuerderen. Dëst géif awer, esou déi parlamentaresch Kommissioun vum Logement, géint den Droit à la protection des données à caractère personnel verstoussen. Eng méiglech Léisung besteet doranner, dem Service des aides au logement eng individuell Autorisatioun ze ginn, déi him da géif erméiglechen, déi néideg Informatiounen bei de Verwaltungen unzefroen.

Een anere Volet am Logement ass dee vum Fonds du Logement. Hei hu Leit den Här Médiateur wéinst der Erhéijung vun de Lokatiounsniwewäschte saiséiert. D'Kommissioun huet doropshin erkläert, dass dës Chargé vu verschiddene Parametere ofhänke géifen, ënner anerem Liewensgewunnechten, Energiepräisser oder Waasserpräisser. De Fonds du Logement huet keng Responsabilitéit fir déi Erhéijung. Déi eenzeg Méiglechkeet, fir deem entgéintzewierken, ass eng konstruktiv Approche vum Fong selwer, dass en eng durabel a performant Energienotzung am Neibau wéi och bei de Renovatiounen vun Algebäier géif duerchféieren.

Et wier dofir ze begréissen, dass d'Awunner vun de Residenzen, déi vum Fonds du Logement géréiert ginn, regelméisseg fir dës wichteg Theme vun der Nohaltegkeet sensibiliséiert géife ginn, ënner anerem, andeem hinne géif matgedeelt géif ginn, duerch wéi eng Mesuren d'Niewewäschten, ënner anerem Waasser, Energieverbrauch, kéinte reduzéiert ginn an domadder hir Käschte kéinte verklengert ginn.

Nach e puer Aussoen aus dem Gesondheetsberäich: Niewent hiren eegene Reclamatiounen, et waren der eng ganz Rei, erënnert d'Madame Médiatrice och un d'Recommandatioun N°42 vum Här Marc Fischbach. Et sollt eng Structure d'écoute, d'information et de médiation locale et nationale am Gesondheetswiese kréiert ginn, déi relativ komplex ass an och bleift.

An de Médiateur kritt relativ vill Plainten. Hien huet awer net ëmmer déi néideg Kompetenzen, fir dës Plainten eng Suite ze ginn; ech hu schonn drop higewisen. Op dës Struktur kéinten dann d'Patienten zrëckgräifen, wa si sech net adequat behandelt géife fillen oder wa si d'Qualitéit vum Gesondheetssystem net an der Rei fanne géifen oder d'Fleegesécherheet net garantéiert géif ginn oder si der Meenung wieren, déi ugebuede Fleeg wär net gutt.

A sengem Rapport begréisst de Médiateur de Gesetzesprojet 6469 relativ aux droits et obligations du patient portant création d'un service national d'information et de médiation dans le domaine de la santé. De Médiateur weist drop hin, dass dës Service de médiation en onafhängege Charakter muss kréien, ouni den et keng Médiatioun kéint ginn. De Gesetzesprojet

6469 ass awer elo viru Kuerzem hei am Parlament gestëmmt ginn an domadder rechtskräfteg.

Här President, Dir Dammen an Dir Hären, an der Petitiounskommissioun wore mir eis eens, dass d'Institutioun vum Médiateur hir Friichte scho gedroen huet. D'Aufgabefeld muss awer weiderentwéckelt ginn. Dat heescht, d'Gesetz misst réviséiert ginn.

D'Kompetenzfelder vum Médiateur sollten erweidert ginn, soudass den Ombudsmann, an deem heite Fall d'Madame Lydie Err, d'Méiglechkeet géif kréien, sech allen Dossierer, bei deenen et ëm ëffentlech Services geet, unzuhuelen, dat onofhängeg, ob si en ëffentlechen oder private Statut hunn. Et muss kloer definiéiert ginn, wat een ënnert dem Begrëff „Service public“ genoe verstee. D'Denominatioun vum Médiateur muss adaptéiert ginn, mir hunn et gesi gehat, mä nach sinn do vill Froen op, an d'Méiglechkeet vun der Auto-saisine muss gekläert ginn.

Mir sinn iwwerzeegt, dass dës Institutioun eng wesentlech Roll am Vertraue vun der Bevëlkerung an dem Fonctionnement vum Stat hei am Land spillt a spille muss. Et ass duerfir wichteg, dass regelméisseg hei am Parlament iwwert de Rapport d'activité vum Médiateur soll diskutéiert ginn.

Ech begréissen och d'Madame Lydie Err a soe Merci fir d'Nolauschteren a fir Är Opmierksamkeet.

► **Plusieurs voix.** - Très bien!

► **M. le Président.** - Merci och deem éischte Rapporteur, dem Marcel Oberweis. An d'Wuert huet direkt den Här Marco Schank, fir den Aktivitéitsrapport vun... 2013 virstellen. Elo hat ech et bal net erauskritt.

#### **Rapport de la Commission des Pétitions (rapport d'activité de la Médiatrice 2013)**

► **M. Marco Schank (CSV), rapporteur.** - Här President, Dir Dammen an Dir Hären, no mengem Kolleg, dem Marcel Oberweis, géif ech dann den zweete Rapport, dee mer an der Petitiounskommissioun adoptéiert hunn, virstellen, dee vun 2013. An d'Madame Lydie Err huet dës Bilan vun hiren Aktivitéiten de 16. Januar hei an der Chamber presentéiert. An doropshin huet dann och, wéi dat Usus ass, d'Petitiounskommissioun all déi aner concernéiert Kommissiounen an der Chamber invitéiert, Positioun zu deene verschiddene Beräicher ze bezéien, fir haut eben den ëffentlechen Débat kënnen ze féieren.

An ech géif dann och direkt um Ufank e puer Statistike virugi vum der Aktivitéit vun der Médiatrice am Joer 2013. D'Petitiounskommissioun war iwwregens sechsmol zesumme, fir iwwert de Rapport d'activité ze diskutéieren, an huet schlussendlech dee schrëftleche Rapport och eestëmmeg de 5. Juni adoptéiert.

Als Alleréischte wëll ech och soen, dass d'Relatiounen tëscht der Médiatrice an der Chamber, am Allgemengen, an der Petitiounskommissioun, am Besonneschen, gutt sinn.

A fir op d'Statistiken zrëckzekommen: Tëscht dem 1. Januar an dem 31. Dezember d'lescht Joer si 688 Reklamatiounen erakomm gewiescht. 507 Dossiere si clôturéiert ginn. Dat mécht ronn dräi Véirel aus. Déi aner 181 Dossiere sinn nach um Lafen. Den Taux de correction global vun deene clôturéierten Dossiere läit ëmmerhi bei gutt 80%. Ronn 35% goufen als net fondéiert Reklamatioun klasséiert. 12% si vun de Reklamanten zrëckgezu ginn. 8% krute keng Korrektioun, bei 8% war dat partiell de Fall. A 24% konnte geregelt ginn. 5,5% vun den Demandé waren irrecevabel an, last but not least, 6,5% goufe refuséiert.

Fir dee statistesche Volet ofzeschléissen, wollt ech nach soen, dass déi meeschte Reklamatiounen eigentlech aus véier Beräicher kumen: Immigration, Steieren, Gemengenaafäre generell a Sécurité sociale.

Direkt ee Wuert zu den neie Reclamatiounen vun der Médiatrice, der Nummer 50 beispillsweis iwwert d'Condition de recevabilité, wat den Achat rétroactif vu Périodes d'assurance ugeet. Hei sinn déi Leit beträff, a ganz dacks Fraen, déi hir beruflech Aktivitéit reduzéiert hu respektiv opgehalen hu mat schaffen an doduerch Versécherungsperiode verluer hunn.

D'Gesetz gesäit vir, dass ee fir déi Periode retroaktiv kann nobezuelen, fir dass se spéider kee Lach an der entsprecherender Pensionscarrière hunn. Dat muss allerdéngs virum 65. Liewensjoer geschéien. Dat steet am Artikel 174 vum Code vun der Sécurité sociale.

Well awer eng Partie vu Leit dat eréischt no 65 Joer maachen, eréischt dann un e Réckkaf denken, kënn et natierlech vir, dass dann d'Méiglechkeet vun engem Réckkaf refuséiert gëtt. A genau dowéinst, dat bedeit jo dann och ganz

désagréabel Konsequenze fir déi Betreffen op d'Revenuen am Alter. An do recommandéiert d'Médiatrice den Délai vu 65 Joer ëm zwee Joer ze verlängeren, fir dass d'Leit wierklech genuch Zäit hunn, fir kënnen hir Pensionscarrière ze komplettéieren, fir dann och finanziell ofgeséichert hire Liewensowend kënnen ze verbréngen.

Als Nächst wollt ech, an dat ass selbstverständlech och nëmme punktuell méiglech, op eng Partie Aise vu verschiddene parlamentaresche Kommissiounen agoen, dëst a Relatioun mat enger Partie Fallbeispiller, un deenen d'Médiatrice hir Verbesserungsvorschläg festmécht.

Zum Beispill ass d'Kompetenz a Saachen Openthaltsgenehmigung vum Passbüro an d'Direction de l'Immigration eriwergaangen; dat huet awer mäi Virriedner scho gesot. Do kann ech mech also kuerzfaassen. Dat war effektiv eng Reclamatioun vun der Médiatrice an hirem viregte Rapport. An et kann een nach vläicht derbäisoen, dass d'Direction de l'Immigration intervenéiert ass an deem Sënn, dass d'Diplomaten, déi zu Bréissel installéiert sinn, op Lëtzebuerg kumen, fir verschidde Problemer vu Reespeieren ze léisen.

D'Kommissioun vun den Affaires intérieures war ënner anerem mat de Subsiden am Kontext vun der Evakuatioun vu Reewaasser beschäftigt. Hei kumen dacks Reklamatiounen eran, well d'Aidé vum Ministère refuséiert goufen, d'Aarbechten awer schonn ugefrot waren, ier iwwerhaupt eng Demande de subside bei der Administratioun erakomm ass. An hei huet d'Médiatrice d'Feele vun engem Délai légal kritiséiert wéi och de Fait, fir e Refus ausschliesslech op d'Nachhinein vun der Commande respektiv den Ufank vun den Aarbechten ze baséieren. Op jidde Fall ass am Moment am zoustännegen Nohaltegekeetsministère amgaangen iwwerluecht ze ginn, fir hei méi eng praxisorientéiert Léisung ze fannen.

Am Héichschoulberäich gongen och eng Partie Reklamatiounen bei d'Médiatrice. Hei ass de CEDIES méi dacks vun der Médiatrice sollicitéiert ginn am Kontext vun der Durée, fir déi déi staatlech Studiebahnhëllef accordeiert ginn. Et ass esou, dass d'Zäitdauer vun de Boursen a Prêté gesetzlech festgeloecht ass. An d'Gesetz gëtt awer och hei an Härtefall, no schrëftlecher a motivéierter Ufro vu Studenten, dem Minister d'Méiglechkeet, eng Ausnahm ze maachen an eng verlängert finanziell Hëllef ze accordeieren.

Hei kumen och Reklamatiounen era vu Studenten, déi de Prêt refuséiert kruten, well se d'Prozeduren an d'Délaien net respektéiert hunn, wéi se reglementaresch festgeloecht sinn. An d'Médiatrice huet proposéiert, d'Demande fir déi finanziell Studiebahnhëllef online ze setze respektiv d'Deadline vun der Demande ofzeschaffen a just nach déi zrëckzebehalen, wou den definitiven Dossier muss erageschéckt ginn. An et ass och an der zoustänneger Kommissioun gesot ginn, dass am Kader vun der genereller Reform vun de Studiebahnhëllef d'Prozeduren iwwer e Reglement kéinte vereinfacht ginn, wat och de Wonsch, wéi gesot, vun der Kommissioun war.

An engem weidere Beräich huet d'Familljekommissioun Stellung bezunn: Eng Famill, déi an engem aneren EU-Land wunnt, huet d'Médiatrice kontaktéiert. De Papp, den d'Lëtzeburger Nationalitéit huet an an eng zoustänneg Pensions- a Krankekeess zu Lëtzebuerg abezilt, huet d'Prestations familiales bis Enn 2012 weider ausbezelt kritt, dat obschonn eng fräiwëleg Cotisatioun entsprechend engem europäesche Reglement net duergeet, fir d'Lëtzeburger Kannergeld kënnen ze kréien. An déi betraffe Famill huet awer ëmmer och d'Kannergeldkeess iwwert d'Situatioun informéiert.

D'Médiatrice ass der Meenung, dass een Accès vun der Kannergeldkeess op de Centre commun vun der Sécurité sociale géif eng besser Kontroll respektiv eng méi séier Adaptatioun erméiglechen. Den Idealfall wier, seet se, eng automatesch Informatioun, soubal d'Situatioun vun enger Famill ännert. Déi zoustänneg Kommissioun war der Meenung, dass se och do d'accord wär mat der Médiatrice, dass d'Kannergeldkeess misst op déi Donnéeën kënnen zrëckgräifen, déi se am Kader vun hirem Aarbecht brauch, seet awer och, dass déi Décisioun schlussendlech bei deem zoustännegen Minister vun der Sécurité sociale géif leien.

Ee Wuert och zum Avis vun der Fonctioun publique. Eng Persoun, déi an engem Musée schafft, hat bei der Médiatrice reklaméiert, well si en internt Reklassement net accordeiert krut, ënnert där Begrënnung, dass de betreffende Musée seng legal Quoten erreecht hätt. An am Code du Travail steet, dass een internt Reklassement am ëffentleche Secteur, e Reklassement an der ursprüngelecher Administratioun oder ëffentleche Service vum concernéierten Agent bedeit, eventuell op een anere Posten oder een aneren Aarbechtsregime.

An d'Médiatrice ass hei der Meenung, dass ee Musée, also een Deel vun den Instituts culturels vum Stat, ënnert d'Tutelle vum Kulturminister fält, an domat déi Instituter als Ensemble administratif géife gëllen. Si huet der Regierung virgeschloen, de Champ d'application vum Reclassement interne an der ëffentlecher Verwaltung ze erweideren. D'Kommissioun vun der Fonctioun publique mécht d'Bemierkung, dass, am Kader vum Projet de loi 6555, déi intern an extern Reklassementer ugepasst wäerte ginn. Wat de Reklassement an der Fonctioun publique ugeet, ralliiert d'Kommissioun sech der Positioun vum Minister, dass déi Fro, wéi gesot, am generelle Kontext vun där Reform géif gepréift ginn.

Dann huet den zoustännegen Minister och confirméiert, dass d'Ufro fir intern Reklassementer staark zougehoen hunn, wat och zu Schwierigkeeten an der Gestioum vun de jee-weilegen Administratiounen féiert.

D'Médiatrice gouf och nach kontaktéiert, well germaniséiert Virnimm op neie Führerschäiner benotzt goufen - eng Geschicht, déi och jo an der Press traitéiert gouf -, woubäi op méi alen Dokumenter de Virnumm nach op Franséisch ass. An opgrond vum Gesetz vum 19. Juni 2013 kruten tëscht 17.000 an 18.000 Biergerinnen a Bierger, déi während dem Zweete Weltkrich gebuer sinn, nei Identitéitspabeiere respektiv Führerschäiner mat hirem ursprüngelechen Numm geschéckt. Allerdéngs huet den zoustännegen Minister dee Moment Mesuren an Aussicht gestallt, fir déi Situatioun méiglechst séier ze redresséieren.

Här President, d'Institutiounskommissioun war e bësse méi laang mat dem Rapport vun der Médiatrice 2013 beschäftigt, net wéinst den Dossierer tel quel, mä virun allem och wéinst dem Avant-propos vum Rapport, wou et haaptsächlech ëm d'Fonctioun an natierlech ëm d'Kompetenze vun der Médiatrice gong. D'Médiatrice huet virgeschloen, am Gesetz vum 2003 d'Promotioun an d'Protektioun vun de Mënscherechter ze preziséieren. Generell ass d'Kommissioun der Meenung, dass een hei net muss légiféieren, well d'Mënscherechter schonn an der Kompetenz vum Médiateur géife leien, vu dass se ka saiséiert ginn, wann eng Reklamatioun bezüglech engem Verstouss géint Konventiounen, Gesetzer oder Reglementer virläit.

Eng interessant Fro ass och déi vun den Délais de recours, déi während där Zäit, wou een Dossier beim Médiateur läit, oflafen an de Reklamant ënner Emstänn onnéideg Gerichtskäschte riskéiert. Hei ass d'Médiatrice der Meenung, dass een Délai de suspension vun dräi Méint soll zu Lëtzebuerg virgesi ginn, ähnlech wéi et elo rezent an der Belsch - ech mengen, do sinn et véier Méint - agefouert gouf.

D'Institutiounskommissioun ass der Meenung, dass déi verschidde Punkte méi déifgräifend missten an enger Reform vum Gesetz iwwert de Médiateur gekuckt ginn, also d'Gesetz vum 2003, wéi et iwwregens och am Koalitiounsofkommes vun der neier Regierung virgesinn ass: «Le Gouvernement analysera la possibilité de réformer l'institution du Médiateur.»

Am Kader vun der Verfassungsreform hat d'Médiatrice proposéiert, d'Institutioun vum Médiateur och an d'Constitutioun anzeschreiwen. D'Institutiounskommissioun war do der Meenung, dass ee soll virsiichteg sinn, wat generell d'Aschreiw vum neien Institutiounen an d'Verfassung ubelaangt. Duerfir wollt d'Kommissioun dës Iddi net weider suivéieren.

D'Médiatrice reagéiert och op d'Aschätzung vu verschiddenen Administratiounen, de Médiateur dierf net an engem Sträitfall agräifen, den um Tribunal ass. D'Médiatrice ass awer hei der Meenung, dass si kéint an enger viru Gericht engagéierter Procédure saiséiert ginn, fir ze versichen, de Konflikt à l'amiable ze léisen, an dass déi zwou Parteie sech iwwert dee Wee ouni Gericht eens kéinte ginn. D'Kommissioun ralliiert sech där Interpretatioun vun der Médiatrice a confirméiert, dass dëst och kloer d'Intentioun vum Législateur war, wann een d'Rapporte vun deemools vun de parlamentareschen Aarbechte vun 2003 noliest.

De Service médical vun der Fonctioun publique hat refuséiert, Stellung iwwer eng Reklamatioun ze huelen, well hien der Meenung war, dass dat ënnert de Secret médical géif falen. Or, d'Médiatrice huet doropshi geäntwert, dass de Secret médical hir net opposabel wier. Den Artikel 6 am Gesetz vum 2003 zielt nëmmen dräi Domänen op, wou dat de Fall ass a wou de Caractère secret ou confidentiel spillt: d'national Verdedegung, dann d'Sécherheet vum Stat respektiv d'Aussepolitik.

D'Médiatrice seet weider, dass de Secret médical net géint den Intérêt vun där concernéierter Persoun ka spillen, wann hire Service kontaktéiert gouf. An d'Institutiounskommissioun ass der Meenung, dass den Artikel 6 vum 2003er Gesetz misst an enger eventueller genereller





Form verdäichtlecht ginn, well den Text awer zu divergenten Interpretatiounen hei kéint féieren.

D'Logementskommissioun huet mat Satisfaktioun festgestallt, dass een eenzege Fall huet missen traitéiert ginn, an zwar am Kontext vum Fonds du Logement, wou an der Tëschenzäit déi Affär och konnt geléist ginn.

Op de Bilan vun den Ëmsetzung vum de Recommandatiounen wëll ech elo weider net agoen, well ech mer awer e bëssen Zäit och nach wollt halen, fir haaptsächlech op d'Konklusioun vum der Petitiounskommissioun anzegoen. Fir den Detail, wéi gesot, vum Bilan, géif ech op dee schrëftleche Rapport hiweisen.

Här President, Kolleeginnen a Kolleegen, d'Konklusiounen géif ech a fënnef Punkte resüméieren, also haaptsächlech, well dat der awer och nach méi sinn. Mä dat sinn awer fir eis Wesentlecher gewiescht.

Éischte Punkt. D'Petitiounskommissioun ass der Meenung, dass eng Evaluatioun vum Gesetz vum 2003 iwwert de Médiateur ubruecht ass, dat hunn ech scho gesot, a si ralliiert sech an deem Kontext och den Avis vum der Institutionskommissioun. D'Médiature ass der Meenung, dass hire Kompetenzberäich soll erweidert ginn. Dat ass och schonn am Rapport 2011-2012 daitlech ginn, an dat fir all Organismen, déi een ëffentlechen Déngscht ubidden, onofhängeg vun hirem Statut, ob dat public oder privat ass. Am Moment ass et nämlech effektiv esou, dat wësst Der, dass de Médiateur just Plainten unhuelen däerf, déi een Organe de droit public concernéieren. Och dat ass an deem viregte Rapport daitlech ginn.

Wat d'Promotioun an d'Protektioun vu Mënscherechter ubelaangt, am Kompetenzberäich vun der Médiature, esou hält déi zoustänneg Commissioun et net fir noutwendeg, ze légiférieren, well déi jëtzeg Législatioun effektiv d'Méiglechkeet géif ginn, dass de Médiateur saiséiert gëtt, wann et hei ëm eng Verletzung vu Konventionen, Gesetzer, Reglementer geet. Allerdéngs muss een hei och preziséieren, dass am Gesetz vum 9. Abrëll vun dësem Joer d'Missioun vum Rapporteur national sur la traite des êtres humains der Commission consultative vun de Mënscherechter uvertraut gouf, an net dem Médiateur.

Elo, wat d'Problematik vun den Délais de recours an enger Affär ugeet, déi beim Médiateur läit, proposéiert d'Médiature en Délai vun dräi Méint vis-à-vis vun de Reklamanten, fir onnéideg riichterlech Fraisen ze évitéieren. Dat hunn ech virdru kuerz ernimmt. An hei, an deem hei Fall begréisst d'Petitiounskommissioun, dass d'Commission juridique bei der Regierung ugefrot huet, eng Recherche de droit comparé vun auslännesche Législatiounen ze maachen.

Dann ass och nach e Sujet, deem och virdru mäi Virriedner, de Marcel Oberweis ernimmt huet, nämlech d'Denominatioun vum Médiateur. Och dat kéint jo een Deel si vun der Analyse, wann een d'Gesetz vum 2003 méi genee kuckt.

Am Kontext vun de Secrets opposables, deelt d'Kommissioun d'Meenung vun der Médiature, dass de Secret médical net opposable ass, wann et ëm de Schutz vu Bierger geet. D'Institutionskommissioun huet, wéi scho gesot, divergent Interpretatiounen opgeworf, wat den Accès zu den Donnéeën vun enger drëtter Persoun ugeet, an ass der Meenung, dass een dese Punkt, wéi gesot, och nach eng Kéier misst dann um Niveau vun der Reform vum Gesetz vum 2003 analyséieren. An hei proposéiert d'Petitiounskommissioun, et sollt een da vun dëser Reform och profitéieren, fir d'Froe par rapport vum Secret bancaire an dem Secret fiscal ze analyséieren.

Den zweete Punkt an eise Konklusiounen dréint ëm d'Ëmsetzung vun der Recommendation Nummer 49, e wichtige Sujet an eisen Aen, iwwert de Code de bonne conduite. Och deem ass schonn am viregte Rapport énoncéiert. Hei hat d'Médiature proposéiert, éischter e sogenannte Guide de bonnes pratiques administratives vun der Regierung ze adoptéieren, amplaz iwwert de gesetzleche Wee ze goen. Dese Guide erlaabt et, esou d'Médiature, ënner anerem, dem Bierger seng Rechter an och seng Flichten ze kennen, an en inspiréiert sech gréisstendeels um Code européen.

De Minister vun der Fonction publique an der Réforme administrative huet vis-à-vis vun der zoustänneger Commissioun ugekënnegt, dass de Projet de Code de bonne conduite administrative, wéi e vun der viregter Regierung ausgeschafft gouf, nach adaptéiert gëtt, an zwar dëst en fonction vun de Mesuren, déi an de parlamentareschen Aarbechte fir de Gesetzesprojet iwwert de Statut vun de Fonctionnaires zrëckbehalen géife ginn. An d'Petitiounskommissioun invitéiert deemno d'Regierung, dese Code de bonnes pratiques administratives méiglechst séier ëmzesetzen.

Beim drëtten Punkt geet et iwwert d'Verbreedde respektiv d'Streeë vu verschiddene Médiationsinstanzen. An Dir wësst, hei gëtt et eng Tendenz, fir a verschiddene Secteure Médiatiounen anzeféieren. D'Médiature huet eis gesot, dass se d'Mise en place vun dem Service national de médiation am Gesondheetswies begreist.

Wat d'Proposition ugeet, fir verschidde Médiationservices an enger Institution ze rassembléieren, huet d'Médiature preziséiert, dass dat zum Beispill a Frankräich de Fall ass mam Défenseur des droits en France.

D'Petitiounskommissioun begréisst och an deem Kontext ausdrécklech d'Démarche, fir eng Maison des droits de l'Homme opzebauen, wou sech déi verschidden Organer op enger selwechter Adress géifen an Zukunft erëmfannen, an zum Beispill och géife mat engem gemeinsame Service d'accueil fonctionnéieren.

Véiertens geet et ëm d'Saisine vum Médiateur, parallel zu engem gerichtleche Recours. Hei stinn d'Petitiouns- an d'Institutionskommissioun hannert der Interpretatioun vun der Médiature. Verschidden Administratiounen sinn der Meenung, dass de Médiateur keng Démarchen kéint entaméieren, wann de Litige schonn um Gericht läit. Fir d'Petitiounskommissioun ass et kloer, dass de Législateur daitlech säi Wëllen am Rapport vum Gesetz vum 2003 artikuliert huet, dass de Médiateur ka vum Recours oder parallel zum Recours intervenéieren, an invitéiert d'Regierung, d'Administratiounen och iwwert dee Punkt dann ze informéieren.

Leschte Punkt. Hei geet et ëm d'Délaien an d'Begrënnungen, am Kontext vun den Äntwerten vun den Administratiounen allgemeng. D'Gesetz gesäit vir, dass de Médiateur all Renseignements kann ufroen, déi e fir seng Enquête als noutwendeg gesäit, an dass all Ministère an ëffentlech Autoritéiten hien dobäi ënnerstëtzen. An d'Médiature insistéiert zu Recht nach eemol drop, dass d'Administratiounen net mussen hirer Meenung sinn, mä dass se sech solle kooperativ weisen, andeems se detailléiert a fondéiert Äntwerte liwweren. D'Petitiounskommissioun invitéiert deemno d'Regierungsmemberen, fir besonnesch drop uecht ze ginn, dass hir Verwaltungen ebe fondéiert Äntwerte ginn an och all d'Délaie respektéieren.

Mäi leschte Saz ass ee vu Merci un all meng Kolleeginnen a Kolleegen aus der Petitiounskommissioun fir déi gemeinsam konstruktiv Aarbecht, an och selbstverständlech e Merci un d'Sekretariat vun eiser Commissioun, d'Madame Tescher an d'Madame Haas an all déi aner, déi ganz vill Aarbecht hunn, net nëmmen mat dësem Dossier, mä och mat den Dossiere vun de Pétitions publiques.

Ech soen lech Merci.

► **Plusieurs voix.** - Très bien!

► **M. le Président.** - Merci och dem zweete Rapporteur, dem Här Marco Schank. An d'Diskussioun geet u mam Här Félix Eischen. Här Eischen, Dir hutt d'Wuert.

**Débat**

► **M. Félix Eischen** (CSV).- Merci, Här President. Dir Dammen an Dir Hären, als Alleréisch, esou wéi dat sech passt, soen ech meng Kolleeg Marcel Oberweis a Marco Schank, an awer och dem Änder Bauler fir seng Viraarbecht Merci, fir déi schrëftlech a mündlech Aarbecht iwwert déi lescht zwee Aktivitéitsrapporte vun der Médiature.

D'Ombudsfra huet an hirem Rapport d'activité vum 2011 an 2012 gesot, dass den Term „Médiateur du Grand-Duché de Luxembourg“, esou wéi en am Gesetz vum 22. August 2003 definéiert ass, zweifellos riskéiert, Onkloerheet mat anere Médiatiounen erbäizeféieren, wéi d'Médiateurs judiciaires en matière civile et commerciale, déi bei engem Sträitfall tëscht zwou private Persounen an d'Spill kéinte kommen. Et géif, laut der Médiature, eng Differenz ginn tëscht der Médiation institutionnelle oder publique engersäits, an der Médiation privée anerersäits.

D'Médiation institutionnelle oder publique sicht an der Regel net no Kompromësser, mä huet d'Méiglechkeet, eng Enquête ze maachen. De Médiateur mécht dat, nodeems hien eng perséinlech Reklamatioun eragereecht kritt huet. Hie versicht dann deem Problem, respektiv engem eventuellen Dysfonctionnement an enger ëffentlecher Administratioun oder engem Service nozegoen, fir dann d'Vertraue vum betroffene Bierger, awer och vum Bierger allgemeng, an déi Administratioun dann an deem Fall nees kënnen hierstellen.

D'Médiation publique ass och bindend fir d'Administratiounen oder de Service, dee viséiert ass, well déi de Froe vum Médiateur mussen nogoen an him och déi néideg Renseignements mussen zoukomme loosser. Do kann et och emol aus dem Kader vun de pre-

zise perséinleche Problemer erausgoen, an d'ropshi kann de Médiateur der Regierung respektiv dem Parlament Recommendationen mat op de Wee ginn, fir dat eent oder dat anert Gesetz esou ze adaptéieren, dass et an Zukunft eben net méi esou wäert sinn, dass déi Problemer sech do kënnen stellen.

Déi privat Médiatioun geschitt tëschent zwou Parteien, déi an engem Sträit leien. D'Médiation probéiert an deem Fall e Kompromëss tëschent de Parteien ze fannen, kann awer keng Enquête maachen! D'Médiation privée ass ëmmer volontaire an op de strikte Kader vum Sträit limitéiert. Se probéiert also eng Solution à l'amiable ze fannen.

Déi zwee Type vu Médiatioun suivéieren zwar am Endeffekt ähnlech Ziler, dohier den Numm, hunn awer net déiselwecht Approche a Pouvaires. Dowéinst dierften, an den Ae vun der Madame Err, déi zwou Zorte Médiatioun net deeselwechten Numm kréien, well dat zu Onkloerheete féiere kéint. D'Madame Err ass der Meenung, dass den Term „Ombudsmédiateur“ am beschten hir Fonctiounen géif zrëckspigelen. Deen Titel reflétéiert hir Kontrollmissioun, mä gläichzäiteg och hir Technik, mat där se kann oder da wëllt virgoen.

D'CSV, awer mir net eleng, mir hunn och Verständnis fir der Madame Err hir Suerg an deem Kontext. Mir sinn awer der Meenung, dass dee virgeschloenen Titel net allen Ämbigüitéiten aus dem Wee geet. Hei hätte mer elo déi zwou Varianten dran, de Médiateur souwuel wéi och den Ombudsmann oder d'Ombudsfra. Mir haten och deemools hir Alternativ zu enger Denominatioun virgeschloen, an zwar Ombudsperson. Déi géif hirer Fonctioun also méi Rechnung droen an et wier och eng schlechtlich neutral Denominatioun. Ombudsmann respektiv Ombudsfra muss een dann och net méi extra betounen. Mir mengen, dass dës Diskussioun an engem breede Konsens an alle Fraktiounen sollt gefouert ginn, an da bei der Evaluatioun vum Gesetz och sollt gekläert ginn.

Wann Der erlaabt, maachen ech dann elo de Lien zum nächste Punkt, deem och direkt eppes mat der Denominatioun ze dinn huet. D'Commission de Venise, d'Berodungsorgan vum Conseil de l'Europe, huet der Médiature an engem Avis iwwert de Gesetzesprojet vum Médiateur du Grand-Duché de Luxembourg bedauert, dass d'Méiglechkeete vum Lëtzebuerger Médiateur méi restriktiv wieren, wéi déi vum sougenannten Ombudsmann, wéi en nottamment an de skandinavesche Länner schonn zënter längerer Zäit besteet. Dëst virun allem, esou d'Commission de Venise, well de Lëtzebuerger Médiateur net iwwert de Pouvoir d'autosaisine verfügt, dat heescht, dass de Médiateur zum Beispill net vu sech aus eng Enquête iwwer eng ëffentlech Administratioun ka maachen.

D'Ombudsfra preziséiert dann och, dass si net d'Méiglechkeet huet, sech enger Plainte unzehuelen, déi vun enger behënnerter Persoun zum Beispill kéint, déi sech da géint eng Privatstruktur richt, wéi zum Beispill eng Klinik. Mir deelen hei net onbedéngt d'Meenung vun der Madame Err, dass si do keng Méiglechkeet hätt, anzegräifen.

D'Gesetz iwwert d'Rechter vun handicapéierte Leit, fir bei deem Beispill ze bleiwen, gesäit nämlech ganz kloer vir, dass de Médiateur am Fall, wou eng behënnerter Persoun d'Gefill hat, dass hir Rechter net respektéiert goufen, eng Saisine ka maachen, à condition dass et sech ëm eng Struktur handelt, déi ëffentlech Déngschtleeschungen ubitt, also onofhängeg awer vum Statut, privat oder public, an dat och selbstverständlech, dass déi concernéiert Persoun net géint eng Interventioun vum Médiateur wier.

Här President, Dir Dammen an Dir Hären, d'Médiature mengt, dass hir Fonctiounen sech och net dierften an technesch Beräicher spezialiséieren. An deenen Domäne brauch een nämlech och dat néidegt Wëssen, Detailwëssen. Als Beispill gëtt se dann och de Schutz vun de Rechter vu behënnerter Leit un. Dëst wier eng spezifesch Missioun, déi een dem Centre pour l'égalité de traitement sollt uvertrauen. Et misst een dem CET dann natierlech och déi adequat Moyenen zur Verfügung stellen.

Hei si mir der Meenung, dass d'Madame Err sech awer an hiren Äusserungen net ganz konsequent ass. Wa si seet, dass de Médiateur keng technesch Beräicher soll traitéieren an awer an engems fuerdert, dass hir Kompetenzen erweidert solle ginn, fir all Organ, dat ëffentlech Déngschtleeschungen ubitt, egal ob et eng privat oder ëffentlech Struktur ass, mam Beispill ebe vun de behënnerter Leit, dann deele mir d'Opfaassung vun der Institutionskommissioun a fannen dat kontradiktoresch, well hei speziell de Gesondheetssektor concernéiert ass. Or, an de Marcel Oberweis hat dat virdrun och scho gesot, et ass awer just dee Sektour, deem äusserst technescher Natur ass.

D'Médiature bedauert dann och d'Gesetz, oder dass d'Gesetz net virgesäit, dass se sech enger Plainte kann unhuelen, déi vun enger Persoun kéint an déi sech géint e private Betrib richt, deem awer ëffentlech Services ubitt. Firwat kann zum Beispill e Bierger, dee mat enger privater Busgesellschaft ënnerwee war, sech net kënnen an d'Médiature richten, fir sech iwwert de schlechte Service opzereggen, wann deem d'Méiglechkeet awer bei engem staatleche Betrib huet? Se proposéiere schlussendlech déiselwecht Prestatioun, an zwar den ëffentlechen Transport. Dat Bedenke kënnen mir duerchaus novollzéien. D'Institutionskommissioun hat jo och hei hiren Avis dozou ginn, an deem se gesot huet, dass dat trotzdem problematesch wier, well een als Alleréisch misst ganz kloer definéieren, wat dann elo e Service public ass. Et géif sech nämlech hei ëm eng ganz vag Notioun handeln.

D'Médiature schléit dann och nach vir, dass d'Mënscherechter an hir allgemeng Kompetenze sollten ageschriwwen ginn. Laut der Madame Err spillt d'Commission consultative des Droits de l'Homme ausschliisslech eng Beroderoll a ka kee Schutz ubidden. Si kann also keng individuell Plainten traitéieren. No de Principes de Paris muss eng national Institution, déi iwwert dës Kompetenzen an der Mënscherechtsfro verfügt, e Mandat kréien, dat ganz kloer an engem Gesetzestext verankert ass. Also misst an deem Fall dat dann an d'Médiateursgesetz drastoe kommen.

Dës Kompetenzerweiderung vum Médiateur werft awer nees aner Froen oder Problemer op, wéi dat och d'Institutionskommissioun bemerkt huet, an zwar déi vu generelle Kompetenzerweiderungen an allen Organismen, déi am Schutz vu Mënscherechter tätég sinn. Vu dass et där awer eng ganz Rei gëtt, stellt sech dann och do d'Fro vun enger effizienter an transparenter Koordinatioun vun all deene Strukturen.

Déi Kompetenzerweiderung fir de Médiateur ass also duerchaus denk- a machbar, mä et muss ee sech dann awer och mat all deene Froe beschäftegen, déi riskéieren, derbäizekommen, an dat sinn der, wéi gesot, vill a si sinn och wichteg.

Da wollt ech och nach op den Avis vum Statsrot zrëckkommen, dee mir och deelen an dee gesot huet, et wier net onbedéngt un der Médiature, fir an esou engem Beräich Konditiounen ze stellen.

Här President, ech wollt dann zum Schluss nach ganz kuerz op e puer aner Aspekter agoen, déi net direkt eppes mam Rapport vun der Madame Err ze dinn hunn, mä éischter mat hirer Aarbechtsaart a -weis.

Dir kéint lech sécherlech nach erënneren, dass an de leschte Méint dacks iwwer Problemer an de Medie Rieds gaangen ass iwwert d'Aart a Weis, wéi d'Madame Err hir Fonctiounen ausfüllt op där enger Säit, a wéi se mat hire Matarbechter ëmgeet op där anerer Säit. Et kann een elo d'Aart a Weis, mat där sech d'Madame Err heiansdo un d'Administratiounen adresséiert huet, bedauern. Iwwert d'Manéier kann een och diskutéieren.

Mir fannen et op jidde Fall elementar fir de gudde Kontakt tëscht der Médiature an den Administratiounen, dass dee Kontakt gutt gefleegt gëtt. Nëmmen esou kann et och zu konstruktive Verbesserungen an den Administratiounen kommen, wann dat dann néideg ass. Dat ass déi al Geschicht: Esou wéi een an de Bësch rëfft...

Wou mir och net ganz glécklech driwwer waren, ass, dass d'Madame Err gläichzäiteg zu hirer Fonctioun als Médiature nach aner Mandater hat an huet, wéi zum Beispill an der Commission de Venise souwéi d'Médiation civile. Och wann dës Fonctiounen net expressément inkompatibel si mat hirer Fonctioun als Médiature, si mir dach awer der Meenung, dass et fir d'Onofhängegkeet vun hirem Mandat besser wär, op dës Niewemandater ze verzichten.

Mir begrëissen dofir och d'Opfuerderung vum Bureau, dass an Zukunft d'Madame Err keng Médiation civile méi soll maachen, a sinn och frou, dass si där Opfuerderung nokéint.

Derneist huet de Bureau vun der Chamber relativ dacks missen agräifen a Konflikter, déi sech tëscht der Médiature an hire Mataarbechter ofgespillt hunn. De Bureau huet domadder eigentlech de Rôle vum Médiateur tëscht deene zwee misse spillen. Mir hoffen, dass dës Zesummenaarbecht sech an Zukunft wäert verbessern, well eng gutt an enk Kooperatioun d'Bedéngung ass, dass d'Institution vum Média-





teur gutt ka fonctionnéieren am Interesse vun de Bierger.

D'Hoffnung, Dir Dammen an Dir Hären, um Schluss sief erlaabt, dass opgrond vun der Feststellung, dass d'Unzuel vun den Dossieren zolidd zrëckgaangen ass, dëst näischt mat der Persoun vum Médiateur a senger Aart a Weis ze dinn huet, mä just mat dem Émstand, dass et allgemeng manner ze knoutere gëtt.

Ech soen Iech Merci fir d'Nolauschteren.

► **Une voix.** - Dat mengt Dir!

► **Plusieurs voix.** - Très bien!

► **M. le Président.** - Merci och dem Här Eischen. Als Nächsten huet d'Wuert den honorebelen Här Marc Angel.

► **M. Marc Angel (LSAP).** - Här President, léif Vertrieederinnen a Vertrieeder vun der Regierung, léif Kolleeginnen a Kolleegen, och am Numm vun der LSAP-Fraktioun wëll ech hei direkt am Ufank...

**(Brouhaha et coups de cloche de la présidence)**

► **M. le Président.** - Et sinn e bësse vill Background-Geräischer. Lauschtert wann ech gelift dem Här Angel no!

► **M. Marc Angel (LSAP).** - Merci, Här President.

Ech wëll direkt, wéi gesot, och am Ufank eng Rei Mercien ausdrécken. Natierlech de Rapporteur vun deenen zwee Rapporte fir hir exzellente schréfflech, awer och mëndlech Presentatioun hei. Dat sinn den Här Oberweis an den Här Marco Schank. Den Här Oberweis fir de Rapport 2011-2012 an den Här Schank fir 2013.

Mir hunn also och engem Wonsch vun der Madame Médiateure Rechnung gedroen, dass mer elo de Rapport mam Kalennerjoer openanerbriengen, an ech mengen, dat ass och gutt esou.

Ech wëll awer och der Secrétaire-administrateur vun eiser Kommissioun, der Madame Anne Tescher, Merci soe fir hir Gedold, déi se mat eis all hat an der Kommissioun, an och fir hir exzellente Aarbecht.

An natierlech deenen zwee Presidente vun der Petitiounskommissioun, déi am Amt waren, wéi mer déi zwee Rapporte vun der Médiateure an der Kommissioun verschafft hunn. Dat ass engersäits de Camille Gira, deen elo Member an der Regierung ass, an anerersäits de Marco Schank, dee fréier an der Regierung war.

An ech mengen, dat ass interessant an et ass och gutt fir déi gutt Zesummenaarbecht. Deen ee weess, deen neie President vun der Kommissioun weess, wéi et op där enger Säit an der Regierung ass, an an der Regierung setzt elo een, dee weess, wéi et ass, wann ee President vun der Petitiounskommissioun ass. An ech mengen, dat kann déi gutt Zesummenaarbecht zwëschent der Petitiounskommissioun an der Regierung nëmmen nach verbessern, an dat souwuel am Dossier, wat d'Petitiounen ubelaangt, déi normal Petitiounen, mä och am Dossier Relatiounen mat der Médiateure, an och d'Aart a Weis, wéi mer hei an der Chamber dee Rapport verschaffen.

Zu där Aart a Weis, wéi mer dee Rapport hei verschaffen, wollt ech vläicht e puer Remarqué maachen. Et ass déi sechste Kéier, wou mir deen Débat hei an der Plénière hunn. D'Erfahrungen, mir hunn all Erfahrungs gesammelt: De Médiateur oder d'Médiateure kënnt, si presentéiert hire Rapport, da kënnt se nach eng Kéier an d'Petitiounskommissioun, duerno verschécke mer alles an d'Fachkommissiounen, déi empfänken da Ministeren oder Vertrieeder vun den Administratiounen, an da gëtt sech oft direkt einfach där Positioun ralliiert.

Et handelt sech awer heiansdo ëm Dossieren, déi Honnerte vu Säiten hunn, wou vläicht nach zousätzlech Erklärungen wäeren, an ech mengen, doriwwer musse mer vläicht an Zukunft eng Kéier schwätzen.

Ech hunn nach a mengen Notize vun där Réunion vum 20. Januar, wéi d'Madame Err bei eis an der Kommissioun war, nogelies, dass d'Madame Err ausdrécklech gesot huet, si wär och bereet, wann de Wonsch kéim vu verschiddene Fachkommissiounen, och an d'Fachkommissiounen ze goen, fir dann nach méi Informatiounen ze ginn a fir och do kënnen da mat ze diskutéieren. Dat war leider net de Fall. Ech mengen, mir kënnen eis eng Kéier zesummesetzen a kucken, wéi mer besser nach kënnen an Zukunft schaffen.

Ech wëll awer och der Madame Médiateure villmools Merci soen an all hire Mataarbechter

aus hirem Service Ombudsmann fir hir Aarbecht, déi si an deene leschte Jore gemaach huet. Si ass am Amt säit dem Joer 2012. Ech wollt just mengem Virriedner, dem Félix Braz, hei soen, en huet ugeschwat, dass d'Madame Err huet missen opgefuerdert...

► **Plusieurs voix.** - Eischen!

► **M. Marc Angel (LSAP).** - Félix Eischen, pardon!

► **Une voix.** - Kennt Der deen net?

► **Une autre voix.** - Dir hutt déi zwee matenee verwiesselt.

► **M. Marc Angel (LSAP).** - Et sinn zwee Sympathescher, dofir hunn ech se matenee verwiesselt.

**(Hilarité)**

Entschëllegt mech! Ech mengen den Här Félix Eischen, dee gesot huet, do hätt d'Madame Err missen opgefuerdert ginn, d'Médiation civile opzehalen.

**(Brouhaha)**

Ech wëll just en Detail dozou ginn. D'Madame Err huet am Kader vu Formatioune, déi si selwer gemaach huet... Si huet jo Médiation studéiert an huet missen nach Médiationen nowiesen, déi se onentgeltlech gemaach huet, a si hat scho selwer déi Décisioun geholl, dat net méi ze maachen.

**(Mme Simone Beissel prend la présidence.)**

Dat gesot, kommen ech dann zrëck. Also, ech wollt der Madame Err an hirem ganzer Equipe Merci soen, awer och dem Här Fischbach, well en Deel vum Joer 2011 an 2012 an deem Rapport, vun deem mer schwätzen, ass jo och nach ënnert dem Här Fischbach gewiescht, an ech wëll him am Numm vun der LSAP Merci soe fir seng Aarbecht, déi e vun 2004 u gemaach huet.

Mir wëssen, dass déi Institutioun Ombudsmann elo zéng Joer huet, an ech mengen, et ass eng jonk Institutioun, déi awer am Laf vun deene leschten zéng Joer ëmmer méi u Bedeutung gewonnen huet. An ech mengen, dat ass wichtig. Si huet ëmmer méi u Bedeutung gewonnen a si ass och ëmmer méi vun der Populatioun vun onsem Land, vun de Biergerinnen a Bierger vun onsem Land unerkannt ginn an och, mengen ech, gëtt déi Institutioun vun de Leit hei am Land héich geschat. Et ass also eng Institutioun, an dat wëll ech hei och am Numm vun der LSAP soen, déi net méi ewechzedenen ass.

Zéng Joer ass awer dann och vläicht de Moment, an dat seet d'Madame Err jo och, d'Madame Médiateure och an hirem Avant-propos, fir iwwert d'Zukunft nozedenken an d'Gesetz vun 2003 vläicht op de Leescht ze huelen. An ech mengen, déi Konklusioun, an dat hu mer jo och vun de Rapporturen héieren, där Iddi huet sech jo och d'Petitiounskommissioun ugeschloss.

Ech mengen, et geet hei net par force drëms, nëmmen d'Kompetenze vum Médiateur ze erweideren, mä et geet virun allem, an dat seet d'Madame Err jo och ganz oft, ëm eng Clarificatioun vun de Kompetenzen. D'Madame Err huet hei de 16. Januar zu deem doten Thema gesot: «Ce qui va sans dire, va encore mieux en le disant!» Ech wollt dat hei répétéieren, well ech mengen, d'Clarificatioun ass do ganz wichtig.

Mir begrëissen als LSAP och déi Neierungen, e puer Neierungen, déi d'Madame Err hei de 16. Januar, wéi se hire Rapport presentéiert huet, virbruecht huet. Ganz begrëssenswäert ass an der zweeter Partie vum Rapport, niewent där Rubrik, wou mer iwwert d'Recommandatiounen an d'Suite, déi déi kompetent Autoritéiten deene Recommendatiounen ginn, wou dat alles beschriwwen gëtt, huet d'Madame Err eng nei Rubrik derbäigesat mam Titel: «Des avis et des suggestions d'ordre pratique aux administrations». An ech mengen, grad dës Rubrik «Avis et suggestions pratiques» begrësse mir als LSAP ausdrécklech, well et sech hei, mengen ech, ëm eng proaktiv an och eng preventiv Approche handelt, fir eben an Zukunft Reklamatiounen ze verhënneren a well heider och d'Repétitioun vun ähnleche Fäll verhënnert ka ginn.

Mir hu jo dëst Joer zwee Rapporte beieneen, an do gesäit een och, wéi verschidde Répétitiounen sinn. An ech mengen, grad dësen Deel, dat wär, fir dat ze verhënneren. An d'Suggestiounen, déi do opgezielt gi vun der Madame Err, erlaben et och den Administratiounen, fir ebe géint identesch Problemer virzegoen, falls et méiglech ass, an dat, ouni dass e Gesetz misst geännert ginn.

Mir freeën ons als LSAP och, dass vill vun deene Suggestiounen mëttlerweil schonn akzeptéiert gi sinn an och applizéiert gi si vun den Administratiounen. Et gëtt nach eng ganz Rei vun deene Suggestiounen, déi amgaang sinn, for-

maliséiert ze ginn, an dat soit duerch intern Instruktiounen an den Administratiounen oder duerch groussherzoglech Reglementer.

An da sinn dat net nëmme Suggestiounen an deem neie Kapitel, awer och Avisen. An ech mengen, och dat ass interessant, souwuel fir d'Regierung, fir déi Leit, déi un neie Gesetzestexten schaffen, wéi och fir eis als Deputéierten, wou mer déi Avisen och solle liesen, wou Erfahrungen, déi d'Madame Err praktesch mécht an Dossieren, ganz gutt opgezielt sinn. Ech ginn elo net an d'Detailer, mä grad, wat de Reklamesch ubelaangt, sinn do ganz wichteg Informatiounen. An ech mengen, dat solle mer eis och alles uliesen a mat verschaffen, wa mer hei nei Gesetzter maachen.

D'LSAP begrëisst natierlech och, dass déi Presseaarbecht vun der Madame Err... Et ass Iech opgefäll, dass an alle Presseorganer regelméisseg Artikele sinn, an enger relativ einfacher Sprooch gehalen. Ech mengen, dat ass wichtig fir d'Leit dobaussen, dass iwwert d'Institutioun vun der Médiateure opgekläert gëtt, Promotioun dofir gemaach gëtt a wichteg Informatiounen erausginn.

Och hat d'Madame Err ugekënnegt, se géif zwielef ëffentlech Konferenzen halen an deenen zwielef Kantonen. Ech mengen, alles dat si Saachen, déi wichtig sinn. Och d'Kollaboratioun mat de Schoulen, déi d'Madame Err mécht, mat verschiddene Lycéeën am Kader vun der Instruction civique, souwuel mat de Schüler a mat den Enseignanten, dat ass och wichtig, dass si an hir Leit do Kontakt mat de Schoulen hunn.

Da wollt ech och hiren Asaz begrëissen, an dat hu mer och an deene leschte Jore schonn oft beschwat, wat d'Verriedung vun den Travailleurs indépendants ugeet. Et si jo vill Reclamanten, déi net d'accord si mat enger Décisioun zum Beispill vum Collège médical oder vum Ordre des Avocats oder vun der Chambre des Notaires oder vun der Vereenegung vun den Dierwiechter. An hei huet d'Madame Err jo Kontakt mat all deenen opgeholl a versicht do gemeinsam Regeln ze fannen, dass si och intern Médiationen maachen. An, ech mengen, do ass vill geschitt an ech wëll hir do am Numm vun der LSAP och villmools Merci soen.

A wann ech richteg informéiert sinn, wäert och elo an der Formatioun beim INAP an och d'Personal vum OLAI Formatioun kréien iwwert de Médiateur. An, ech mengen, dat ass gutt esou, fir dass all Verwaltung d'Missionen, an dat ass wichtig, dass all Verwaltung d'Missiounen richteg erkläert kréien an de Médiateur net als Kontroll ugesi gëtt oder als eng Aart Procureur, wat en effektiv net ass.

Et ass och wichtig, et ass wierklech wichtig, de Rôle an d'Kompetenze vum Médiateur, dass déi kloer sinn. An ech erënneren drun, ech zitieren nach eng Kéier d'Madame Err, wéi se de 16. Januar hei hire Rapport presentéiert huet. Si huet gesot: „Den net gudd Wëlle vu verschiddene Partner, fir eng Léisung ze fannen, gëtt kloer, wa si vun Ufank un d'Kompetenzfeld vum Médiateur contestéieren.“ An dofir ass et ebe wichtig, dass déi Kompetenz kloer sinn an dass déi och gutt erkläert sinn.

Dir Dammen an Dir Hären, ech wollt zu enger Recommendatioun e bësschen an den Detail goen, dat ass de Code de bonne conduite, d'Recommandatioun 49, wou mer eis an der Commission des Pétitions jo ralliiert hunn; de President huet et och hei a senger Ried gesot. Dee Code de bonne conduite huet eng ganz laang Geschicht.

Den 21. Juli 2008 hat schonn de Virgänger vun der Madame Err, de Médiateur Fischbach d'Recommandatioun 34/2008 gemaach «relative à l'introduction d'un Code de bonne conduite administrative». Dunn huet den 11. Mee den deemolege Fonction-publiques-Minister Wiseler Positioun geholl a gesot, dass déi Aspekter vun deem Code de bonne conduite, wat d'Relatiounen mat de Citoyenen an Agents administratifs géif ugoen, also abezu géife ginn an de Code de déontologie vun der Fonction publique.

Déi Elementer vum Code de bonne conduite, déi awer d'Administratioun als Lieu d'accueil oder Lieu de contact géife betreffen, déi géifen a sougenannte Chartes d'accueil et de service erakommen. De 14. September 2012 huet dann den deemolege Justizminister Biltgen d'Médiateure an och d'Fonction-publiques-Ministesch informéiert iwwert den Avant-projet vun engem Règlement grand-ducal, deen d'Déontologie-Regele vun der Fonction publique géif regelen.

Mëttlerweil wësse mer jo, dass de Conseil d'État mat där Virgoensweis net d'accord war, dass een déi Déontologie-Regele géif an engem Règlement grand-ducal festleeën. An dofir huet och deen neie Minister vun der Fonction publique, den Dan Kersch, direkt gesot, dass déi Froe vun der Déontologie mussen an dat

neit Gesetz iwwert de Statut vum Fonctionnaire agebaut ginn.

Déi Recommendatioun 49, do geet et awer net nëmmen ëm Froe vun der Déontologie, do geet et och ëm Froe vun der „bonne pratique administrative“. An d'Madame Médiateure erklärt dat ganz gutt a si huet sech och inspiréiert, an dat schreift se och, un deem, wat um EU-Niveau leeft. Um EU-Niveau sinn an zwee verschiddenen Dokumenter engersäits déi deontologesch Obligatiounen vun den EU-Fonctionnaires festgeschriwwen an dann anerersäits gëtt et e Code de bonne conduite administrative.

D'Fonction vum esou engem Code de bonne conduite ass et jo, fir eng Kultur an den Administratiounen ze garantéieren, déi achséiert ass op Service an op Effikassitéit. D'Administratioun därerf sech net contentéieren, hir legal Missioun am engste Sënn vum Wuert ze exekutéieren. Si muss den Usager, fir net Administréiert ze soen, an de Mëttelpunkt stellen. An déi dote Praxis gëtt zum Gléck an deene meeschte Verwaltungen jo och schonn ugewannt. An esou Prinzipien a Regele vun der „bonne conduite administrative“ erlaben et och dem Médiateur, am Fall vu Reklamatiounen, seng Evaluatioun dann esou objektiv wéi méiglech ze maachen. Esou e Code de bonne conduite ass also och en Outil d'évaluation. An ech mengen, déi Meenung deelen ech, déi huet jo och d'Commission des Pétitions mat der Madame Médiateure gedeelt.

An dat war och schonn an der leschter Petitiounskommissioun de Fall, an dofir kënne mer ons och all freeën, mat der Médiateure, wéi si och an hirem Rapport schreift, dass d'Regierung, déi nei Regierung an hirem Regierungserklärung schreift: «le Gouvernement mettra en œuvre un code de bonne conduite administrative».

Ech erlabe mer dofir dem Här Dan Kersch, dem zoustännegen Minister awer nach eng Fro ze stellen. D'Madame Médiateure kënnt jo, wéi gesot, an hirem Rapport zweemol hei drop zrëck a si schreift, an dofir wëll ech zitieren, wa si iwwert dee Code de bonne conduite schreift, ech zitieren: «Il s'agit en effet de soft law, c'est-à-dire de règles de conduite adéquate au sein de l'administration, qui ne doit pas passer par la procédure légale usuelle. Pour clarifier la nature particulière desdites règles, la dénomination de guide de bonnes pratiques administratives aurait l'avantage de ne pas laisser subsister le doute sur la nature sui generis du document en question.» Meng Fro un de Minister ass, ob Dir och déi do Ausso zum Deel kënnt deelen.

D'Médiateure schreift dann nach op Säit 93, dass si iwwerzeegt ass, dass de Code, deen d'Regierung an hirem Regierungserklärung anoncéiert huet, dat ass, wat si mengt. Ech mengen, doriwwer kënne mer jo dann och nach Informatiounen kréien. Mir sinn op jidde Fall als LSAP der Meenung, dass esou e Guide de bonnes pratiques wichtig ass an dozou bäidréit, fir d'Décisiounen vun Administratiounen méi kloer a méi transparent ze maachen an et ze erlaben, dem Usager, awer och dem Beamten, d'Ausmooss an d'Grenze vu senger Rechter a vu senger Flichten ze kennen.

A se erlaben et, wéi gesot, der Médiateure, am Fall vu Reklamatiounen, eng Prise de décision administrative net nëmme par rapport zur Konformitéit zum Droit, mä awer och par rapport zu der Aart a Weis, wéi esou eng Décisioun geholl gouf, andeem se sech baséiere kann op Kritären, déi an engem Guide de bonnes pratiques stinn.

D'Délais de recours waren och ugeschnidde gi vun der Madame Err - de Justizminister ass awer elo net hei, mä, ech mengen, do hu jo och meng Virriedner scho vill dozou gesot. Ech mengen, do ass et wichtig, dass, wéi d'Commission juridique gesot huet, do soll do eng Étude de droit comparé gemaach ginn. D'Belsch, déi hunn dat elo, dass et do en Délai de recours gëtt, wann d'Leit bei de Médiateur ginn. An ech mengen, do suivéiere mer elo emol d'Aarbechten am Justizministère, an dann hoffe mer, dass mer do och deen Délai an eist Gesetz erakréien. Well deen Délai gëtt et iwwerens och bei der Médiation civile et commerciale.

Ech kierzten e bëssen, well scho villes gesot ass, léif Kolleeginnen a Kolleegen. Dann ass nach d'Fro vum Secret - déi ass och schonn ugeschwat ginn -, ob een der Médiateure kann e Secret médical oder en anere Secret opposéieren. D'Gesetz gesäit just dräi Secrete vir, déi ee kann der Médiateure opposéieren. Dat ass dee vun der Défense nationale, d'Sûreté de l'État an d'Politique extérieure. An dofir, mengen ech, ass dat och eng Fro, wou mer wierklech als LSAP och d'Meenung deele vun der Petitiounskommissioun an der Petitiounskommis-sioun, dass een hei keng aner Secreten der Médiateure kann opposéieren.





An ech erënneren och drun, wat d'Institutionssmissioun gesot huet am Avis 2003, wéi mer d'Gesetz kritt hunn iwwert de Médiateur. Do hat de Conseil d'État och nach aner Secreten opgezielt, an d'Commission des Institutions huet deemools den Avis vum Conseil d'État an där doter Fro och net befollegt an huet sech just op dräi Exceptionen, d'Défense nationale, d'Sûreté an d'Politique extérieure limitéiert.

D'LSAP-Fraktioun ralliéiert sech natierlech och, wéi d'Commission des Pétitions an d'Institutionssmissioun, op déi Initiativ vun der Maison des Droits de l'Homme, déi steet jo och an der Regierungserklärung dran, wou den ORK, also den Ombudskomitee fir Kannerrechter, de Centre d'égalité de traitement an d'Commission consultative des Droits de l'Homme an d'Mediatur sollen ënner engem Daach sinn, mat Pignon sur rue a visibel fir d'Biergerinnen an d'Bierger. Dat ass e Projet, wou mir och hoffen als LSAP-Fraktioun, dass deen esou séier wéi méiglech ka realiséiert ginn an dass mer dat kënne d'nächst Joer aweie goen.

D'LSAP begréisst och d'Konklusioun vum der Petitionssmissioun an der Institutionssmissioun, dass déi zwou Kommissiounen sech der Médiateure ralliéiere bei hirer Interpretation, dass d'Saisine vum Médiateur conjointement mat engem Recours juridictionnel méiglech ass.

Da schlësse mer eis natierlech och de Konklusioun vum Rapport vum Här Schank un, dass sech, wéi gesot, eng Evaluatioun vum Gesetz vum 2003 iwwert de Médiateur imposéiert, fir dass mer déi Froen, déi ech elo deelweis ugeschwat hunn, déi anerer ugeschwat hu viru mir an déi sécher nach aner Froen, déi vun den nofolgende Riedner ugeschwat ginn, fir dass mer dës Froen, wou mer deelweis e Konsens hunn, ee fir allemol kënne beäntweren. An et geet drëms, wéi ech ufanks gesot hunn hei, virun allem ëm Clarificatioun.

D'Fro vun der Promotioun an der Protektioun vun de Mënscherechter, déi ass ugeschwat ginn, d'Suspensioun vum Délai de recours, d'Denominatioun - wou ech net wéi weider drop agoen, wéi d'Institution soll genannt ginn; ech mengen, do hunn d'Virriedner scho vill gesot - an dann och nach d'Fro vun de Secreten, déi opposabel sinn, déi ech ugeschwat hunn.

Alles dat si Froen, wou mer elo missten, mengen ech, Neel mat Käpp maachen. An dofir, soen ech, ass et jo och ze begrëssen, dass d'Regierung an hirer Erklärung seet, also, mir hunn als Konklusioun vun der Petitionssmissioun gesot, mir solle vum Gesetz vum 2003 eng Evaluatioun maachen. Ech mengen, dee Konsens besteet, déi gëtt elo gemaach. An da soll aus der Evaluatioun d'Regierung hir Aarbecht maachen, a wéi se och an der Regierungserklärung schreift. Si mécht dann eng Analys, si soll analyséieren: «la possibilité de reformer l'institution du Médiateur».

Op deene Froen, wat d'Mënscherechter ubelaangt, wat jo d'Regierung och seet, an dann d'Fro vum Traitement égal, deen d'Regierung wëllt, fir all Reklamant vun Etablissementer, déi mat der Gestiou vum engem Service public chargéiert sinn an déi mat ëffentleche Gelder finanzéiert ginn. Dat ass wichteg. An dann, drëttens, d'Regierung wäert och dofir suergen, seet se an hirer Erklärung, dass d'Uwende vum Schutz vu Leit mat spezifesch Besoinen, souwuel am Secteur privé wéi am Secteur public garantéiert ass.

Wéi gesot, an all dës Froen leie Léisungen um Dësch, Léisungen vun der Médiateure, Léisungen, déi heiansdo anerer si vun deene verschiddene Kommissiounen, vun der Commission des Pétitions. Wéi gesot, a ville Punkte si mer eis eens. Dofir den Opruff, elo musse mer Neel mat Käpp maachen.

Zum Ofschloss wëll ech eppes soen: Ech hunn ugefaange mat ville Mercien, ech wëll och mat Mercien ofschlëssen, an de Lëtzeburger Verwaltung Merci soen an all deene ville Leit, déi an onse Verwaltungen dagdeeglech am Dëngscht vum Bierger schaffen.

Wat mir haut hei diskutéiert hunn, si jo Ausnahmefäll, dat si Reklamatiounen. An dofir soll een net mengen, iwwerall géif alles schlecht goen. Mir hunn eng exzellent Fonction publique, an dat schätze mir och. Mir diskutéieren haut, wéi gesot, déi Exceptionen, déi Reklamatiounen. A wa mer eis Aarbecht och gutt maachen, da kréie mer all Joers manner Reklamatiounen ze traitéieren. Dofir wëll ech natierlech och all deene Leit Merci soen, an och wëll ech deenen Administratiounen Merci soen - an dat huet d'Madame Err jo och an hirem Rapport gesot - fir déi gutt Kooperatioun zwëschen den Administratiounen an dem Service vun der Mediatioun.

Här President, Dir Dammen an Dir Hären, fir ofzeschlëssen, all Biergerin, all Bierger huet

d'Recht op eng gutt Verwaltung, an d'Mission vum Médiateur ass d'Applicatioun vun deem esou wichtege Prinzip. An dës Prinzip ass iwwregens och am Artikel 4 vun der Charte des droits fondamentaux vun der Unioun, vun der Europäescher Unioun ganz fest verankert an et ass un eis, un der Chamber, zesumme mat der Regierung an zesumme mat der Médiateure, fir dës Prinzip ze garantéieren fir eis Biergerinnen a Bierger.

Dat gesot, soen ech lech Merci fir d'No-lauschteren.

► **Plusieurs voix.** - Très bien!

► **Mme la Présidente.** - Merci, Här Angel, fir déi flott Interventioun. Als nächste Riedner ass ageschriwwen: den Här Deputéierte Guy Arendt.

► **M. Guy Arendt (DP).** - Merci, Madame Presidentin. Dir Dammen an Dir Hären, léif Kollegen, de Rapport vum Ombudsmann 2011-2012 war d'lescht Joer drop an dru vu sengem Rapporteur, mengem Parteikolleg, dem André Bauler hei virgestallt ze ginn. No de Wahlen ass et elo un der Opposition, e virstellen. An op dës Plaz soen ech dem André awer nach eng Kéier Merci fir de Rapport a seng exzellent Viraarbecht, op déi meng Interventioun sech bezieht.

Mëttlerweil sinn zwou Recommandatiounen emgesat ginn, mä ee vun den Haaptsubjeten aus dem Rapport ass nach ëmmer aktuell. Der Madame Err hiren éischte Rapport huet virun allem op déi éischt aacht Joer vum Médiateur sengem Bestoen zrëckgekuckt. Déi nei Médiateure huet d'Geleeënheet genotzt, fir eemol Bilanz iwwert den Émfang vun hirem Mandat ze maachen.

2003 huet e Gesetz de Médiateur an d'Liewe geruff. Eng Institution, déi um Pabeier steet, brauch seng Zäit, bis dass se op de Bee steet an et kann een net mat genauer Prezisioun viraussoen, wéi sech esou eng Institution entwéckelt. Eréischt am Laf vun de Jore fällt eis op, dass verschidden Aspekter geännert musse ginn. Et gouf vläicht net alles direkt agesat, an eng Revisioun vum Gesetz drängt sech dofir op.

Madame Presidentin, de Marc Fischbach huet schonn drop opmierksam gemaach, dass dem Gesetz no, d'Reklamatiounen, déi de Fonctionnement vu Stats- a Gemeengeverwaltungen, esou wéi och déi vun den ëffentlechen Etablissementer a Fro stellen, ënnert dem Médiateur seng Kompetenz falen.

An dem Spidolssektor, an et ass schonn ugeklungen de Mëtteg, beschränkt dem Médiateur seng Kompetenz sech zum Beispill awer ausschliesslech op déi Spideeler, déi en ëffentleche Statut hunn, während Kloe aus private Kliniken net kënne beim Ombudsmann behandelt ginn. Dës Kliniken ënnerleien net senger Kompetenz. Esou stellt sech berechtegterweis d'Fro vun der Kohärenz an Médiateur senger Aktioun.

An där preziser Fro stellt sech d'DP hannert der Kommissioun hir Positioun, déi seet, dass, ier d'Kompetenz vum Médiateur kënnen erweidert ginn, sech fir d'Éischt eng ganz Rei aner Froen musse gestallt ginn. Mir musse fir d'Éischt ganz kloer den Term „service public“ definéieren. Wat fällt genau ënnert deen Term „service public“?

Wéi solle mer dat definéieren? Jee no Secteur? Andeem mer objektiv Kritäre festleeën, wéi zum Beispill en Agrément, oder d'Héicht vun de Subventiounen, déi eng privat Klinik oder konventionéiert Strukture wéi Crèche oder Maisons relais kréien? D'Notioun soll am Kader vun enger Revisioun vum Médiateurgesetz festgeluecht ginn.

Ech wëll och kuerz op d'Diskussioun agoen, wou virgeschloe gëtt, dem Médiateur en neien Numm wëllen ze ginn, an zwar dee vum „Ombudsmédiateur“. Vläch gëif dës nei Benennung d'Kompetenz vum Médiateur besser erëmginn, well souwuel Elementer aus dem skandinavesch Modell vum Ombudsmann an eiser Institution zrëckzefanne si wéi och d'Technik vun der Mediatioun.

Ech denken awer net, dass d'Verwiesslungsgefor zwëschen dem Médiateur an dem Médiateur judiciaire wierklech esou grouss wier, dass mir den Numm sollten ëmänneren. An der kommerzieller an ziviler Mediatioun ass de Sträitfall zwëschen zwou concernéierte Parteien, déi wëssen, ëm wéi e Médiateur et sech handelt.

Dann ass et och esou, dass et hei zu Lëtzebuerg eng gewësse Personaliséierung ëm de Médiateur gëtt. Den Numm vun der Persoun um Poste geet ganz oft duer, fir ze wëssen, ëm ween an em wat et geet. An och wann den offiziellen Titel dee vum „Médiateur du Grand-Duché de Luxembourg“ ass, bleift den Term „Ombudsmann“ an der Émgangssprooch am Gebrauch. D'DP hält den Term „Ombudsmédiateur“ fir e ganz onglécklechen a schwéierfälligen Term.

Wat den Droit d'auto-saisine ubelaangt, ass meng Fraktioun der Meinung, dass déi aktuell Kompetenzen a puncto Saisine, wéi se am Gesetz virgesi goufen, duerginn, soudass de Médiateur keen Droit d'auto-saisine soll kréien. Den Droit d'auto-saisine geet wäit iwwert d'Attributiounen eraus, déi d'Gesetz vum 2003 virgesäit.

Dem Médiateur seng Mission ass et, vu concernéierte Bierger Kloe unzehuele betreffend de Fonctionnement vun de staatleche Verwaltungen a vun de Gemenge souwéi vun ëffentlechen Etablissementer. Sollt de Médiateur feststellen, dass ee bestëmmte Fall, deen him ënnerbreet gouf, keen Eenzelfall ass, huet e jo ëmmer de Moyer vun der Recommandatioun, déi en dann an engem bestëmmte Kontext ausschwätze kann.

Madame Presidentin, léif Kollegen, ech sinn och frou kënne feststellen, dass fir d'Recommandatioun 47, déi drop opmierksam gemaach huet, dass d'Indépendanten, déi an de Congé parental ginn, an hirer Indemnité de congé de maternité benodelegt sinn, eng Léisung fonnt ginn ass. Indépendantë sinn net grad heefeg an der Zuel. Wéineg Fraen entscheede sech fir esou e beruffleche Statut. Et ass vill Asaz gefrot, an zemoos während enger Schwangerschaft an an den éischte Méint no der Gebuert ass et wichteg, adequat ënnerstëtzt ze ginn. Hei huet sech ganz kloer eng Fro vu Gläichbehandlung gestallt. Déi Fraen, déi sech fir e liberale Beruff entscheet hunn, konnten op kee Fall vis-à-vis vun de Salariéë weider diskriminéiert ginn.

Eng vun de grouse Recommandatiounen, déi och schonn am Här Fischbach sengem Rapport virgeluecht gouf, ass d'Recommandatioun 45 zum Iwwerwaachungsorgan iwwert d'Ordres professionnels. Et ass och schonn driiwer Rieds gewiescht. No der ursprénglecher Iddi, een extern Kontrollorgan anzeféieren, war d'Pist vun enger interner Mediatioun, déi géif erlaben, eng Aart Recoursprozedur innerhalb vum Ordre anzeféieren, ugeschwat ginn. D'Anféierung vun interne Mediatiounsstrukturen ass eng gutt Iddi. Mir als DP soen awer, dass de Format fir all Ordre oder Chambre deen nämlechte sollt sinn. De Médiateur soll awer an deem Kontext keng Roll spillen.

Déi lescht Entwécklung vun dëser Recommandatioun ginn de Wee iwwert d'Fédération luxembourgeoise des travailleurs intellectuels indépendants. Dëst soll de Virdeel hunn, dass net nëmmen déi fënnef Ordren, wéi se elo bestinn - d'Chambre des Notaires, den Ordre des Architectes et des Ingénieurs, d'Chambre des Huissiers de justice, de Collège médical an den Uerder vun den Affekoten -, mä all d'Membere vun der FTI, esou wéi d'Assureuren oder d'Kinéén, eng intern Mediatiounsstell kréien, wat natierlech d'Kohärenz an d'Visibilitéit vun deem Ganzen erhéicht.

De Virschlag, iwwert d'FTI an enger zweeter Phas eng extern Mediatiounsstell ze schafen, gesi mir als eng eventuell Méiglechkeet. Dach denke mir, dass ewentuell dëser externer Ulafstell awer och am Orden oder Chamber vum jee-weilege Beruff d'intern Mediatioun muss bestoe bleiwen.

Loosst mech nach op e leschte Punkt agoen, an zwar dem Médiateur seng Kompetenz am Beräich vun de Mënscherechter. Bei der Diskussioun, ween déi zoustänneg Institution am Fall vu Plainte vun handicapéierte Leit géint een Organisme à statut privé wier, war gemengt ginn, dem Médiateur ausdrécklech Kompetenzen an deem Beräich vun de Mënscherechter ze ginn.

Op kee Fall sollten déi Funktiounen a spezifesch Secteuren opgedeelt ginn, mä de Médiateur sollt eng Institution extraordinaire mat enger genereller Funktioun bleiwen, déi aner Kontrollorganer just soll ergänzen.

Am Moment huet d'Mënschrechtskommissioun just eng generell Mission de défense ouni awer kënnen individuell Plainten unzehuelen. Esou wéi ech dat schonn am Ufank erkläert hunn, misst déi Erweiterung vun der Kompetenz iwwer eng Gesetzesännerung goen. Ech erënnere just drun, dass d'Institutionssmissioun drop opmierksam gemaach huet, dass déi Erweiterung awer eng Rei weider Froen wäert opwerfen, an zwar: Wéi gesäit et mat deenen anereren Organer aus, déi fir d'Protektioun an d'Promotioun vun de Mënscherechter schaffen? Missten déi net och hir Kompetenzen erweidert kréien?

Madame Presidentin, Dir Dammen an Dir Hären, ech kommen elo op de Rapport vun der Médiateure fir d'Joer 2013 ze schwätzen. No-deems dësen de 16. Januar dëses Joers an der Chamber virgestallt gouf, ass an all den zoustänneg Kommissiounen dee Rapport analyséiert ginn, fir eben haut en Débat d'orientation iwwert dës Rapport ze organiséieren.

Et ass op dëser Plaz net meng Aufgab, fir dem Rapporteur seng exzellent Aarbecht nach eng

Kéier ze maachen, an dofir wëll ech hei och net op de statisteschen Deel vum Rapport zrëckkommen. Et muss een awer feststellen, dass d'Médiateure vill ze dinn huet, wat en Zeechen ass, dass och am Joer 2013 d'Leit sech u si gewannt hunn; dass de Médiateur also seng Plaz an eisen Institutionen definitiv fonnt huet.

D'Dossieren, déi bei der Médiateure um Dësch leien, beinhalt Reklamatiounen aus ganz verschiddenen Domänen, esou wéi zum Beispill am Domän vun der Immigration, dem Logement, Steierfroen, der Sécurité sociale an dem Kannergeld. Wéi Der wësst, beschäftegt sech d'Médiateure och mat Themen, op deenen et op Gemengenniveau Reklamatiounen gëtt, esou zum Beispill wat urbanistesche Froen ugeet.

Mat deem kuerzen Exposé wollt ech eis all heibannen nach eng Kéier virun Ae féieren, dass d'Institution vun der Médiateure Funktiounen iwwerhëlt, déi wichteg sinn, fir dass eise Statsapparat déi konkret Suerge vun eise Matbierger besser erfaassen an da léise kann. Et ass och an deem Sënn, dass d'Médiateure d'Méiglechkeet an hirem Rapport huet, fir eng Rei Recommandatiounen ze maachen.

An anere Wieder: Si weist de Législateur op eventuell Schwiergekeeten hin, déi d'Leit an der alleeeglecher Applikatioun vun Dispositiounen hunn. Ech mengen, mir sinn eis all heibannen eens, dass esou d'Médiateure och dozou bäidroen kann, fir d'Simplification administrative weiderzeféieren.

D'Recommandatioun 50, déi d'Médiateure an hirem Rapport vum Joer 2013 publizéiert, handelt vun de Recevabilitétskonditiounen bei Demandé fir de retroaktive Kaf vun Assurancépériodes. Dëst ass zum Beispill de Fall bei Leit, déi zu engem Moment an hirem Liewen eng Zäichen net méi oder manner geschafft hunn an duerno d'Méiglechkeet hunn, fir dës Zäit souzeseen zrëckzekafen.

An deem Zesummenhang schléit d'Médiateure vir, fir de Seuil vu 65 Joer, virun deem esou en Zrëckkaf ugefrot gi muss, op 67 Joer ze erhéien. Si berëfft sech an hirem Argumentation och op eng Publikation vun der OCDE, déi ebenfalls op eng Simplification administrative op deem Punkt hiweist. D'DP deelt dee Virschlag vun der Médiateure an dëser Fro.

Dës Recommandatioun ass also e Beispill, wéi nützlich d'Aarbechte vun der Médiateure sinn. Eng Aarbecht, déi derfir suert, dass de Kontakt tëschent dem Législateur an dem Bierger am Sënn vu béiden ass. Op där enger Säit kënnen eis Dispositiounen esou nach méi no beim Bierger sinn, an op där anerer Säit gëtt dem Bierger säin Émgang mat den Administratiounen vereinfacht.

Wéi ech dat schonn ugeschwat hat, huet all zoustänneg Kommissioun de Rapport vun der Médiateure analyséiert, besonnesch wat déi Punkten uginnt, déi am Zesummenhang mat hire Kompetenz stinn. Och deen Deel huet de Rapporteur schonn am Detail virgedroen, soudass et fir mech do näischt méi bäizefüge gëtt. Datselwecht gëllt fir d'Émsetze vu Recommandatiounen, déi schonn an de leschte Jore vun dem Médiateur publizéiert goufen.

Ech wëll dann awer nach kuerz op e puer Konklusiounen vun der Commission des Pétitions agoen.

Wéi schonn an deene viregte Rapporten, gëtt och an deem erëm d'Fro opgeworf, ob et net méi kohärent wier, fir d'Kompetenz vum Médiateur ze erweideren. Wéi ech dat elo ebe schonn am Zesummenhang mat dem Rapport vum 2011-2012 gesot hunn, widerhuelen ech op dëser Plaz nach eng Kéier d'Positioun vu menger Fraktioun zu deem Thema.

Ier d'Kompetenz vum Médiateur kënnen erweidert ginn, ass et néideg, sech als Éischt eng ganz Rei aner Froen ze stellen. Eng ganz zentral Fro ass, wéi een d'Notioun vum „service public“ genau definéiert.

D'Médiateure stellt fest, dass, wann eng Reklamatioun beim Médiateur déposiert gëtt, do-duerch den Délai vun engem Recours virun de Juridictionen net ënnerbrach gëtt. Well et do-wéinst awer zu Komplikatiounen komme kann, gëtt proposéiert, en Délai de suspension vun dräi Méint anzeféieren fir Reklamatiounen, déi virun de Médiateur bruecht goufen.

D'Petitionssmissioun begréisst op deem Punkt d'Initiativ vun der Commission juridique, fir de Justizminister ze invitéieren, eng Etüd ze maachen, fir erauszefannen, wéi dës Fro an anere Législatiounen gehandhabt gëtt.

Och an deem Rapport weist d'Petitionssmissioun op eng Diskussioun iwwert den Numm vun der Institution vum Médiateur





hin, deem säin Numm seng Funktiounen besser beschreiwe sollt. An deemem Kontext verweisen ech op d'Positioun vun der DP, déi ech lech virun e puer Minutten op dëser Plaz beschriwwen hunn.

Am Allgemenge schléit d'Petitiounskommis-sioun eng Evaluatioun vum Gesetz vum 22. August 2003 iwwert de Médiateur vir.

Zum Schluss invitéiert d'Petitiounskommissioun dann nach d'Regierung, hir Administratiounen drop opmierksam ze maachen, hir Äntwerten an de virgesinnenen Délaie matzedeelen. Och hei si mer erëm am Beräich vun der Simplification administrative.

Madame Presidentin, mir stelle fest, dass de Médiateur nach eng jonk Institutioun ass. Vill Froe ronderëm seng prezis Kompetenze mussen nach beäntwert ginn. An ech denken, dass kee Wee laanscht eng Gesetzesännerung wäert féieren.

D'Demokratesch Partei wäert all Ännerung, fir dem Médiateur all déi Mëttel ze ginn, fir kënne seng Missioun an de beschte Konditiounen ausféieren, ënnerstëtzen, hätt awer Schwierigkeeten dermat, wann dem Médiateur seng Kompetenze wäit iwwert dat, wat 2003 virgesi wor, géife goen.

De Médiateur ass eng Institutioun, deem seng Rapporten dem Législativ vu grousser Hëllef sinn, wann et drëms geet, Gesetzter ze schafen oder se ze änneren, fir de Realitéite vun de Bierger Rechnung ze droen.

Ech soen lech villmools Merci.

► **Plusieurs voix.** - Très bien!

► **Mme la Présidente.** - Merci dem Här Deputéierte Guy Arendt fir seng interessant Kontributioun. Als nächste Riedner ass ageschriwwen den Här Roberto Traversini.

► **M. Roberto Traversini (déi gréng).** - Merci, Madame Presidentin. Dir Dammen an Dir Hären, ech wëlt fir d'Éischt soen, dass et schéin ass fir mech an dass ech frou sinn, dass ech därëf hei stoen.

Am Numm vun der grénger Fraktioun wëll ech och fir d'Éischt deenen zwee Rapportere Merci soe fir déi ausféierlech schrëftlech a mëndlech Rapporten. Et gouf scho vill vu menge Virriedner gesot, an ech wëll hei net alles nach eng Kéier widderhuelen, just fir et gesot ze hunn. D'Zuelen aus de Rapporten schwätze fir sech an och déi wichtegst Recommendationen goufen hei scho ganz gutt kommentéiert. Ech wëll dofir just op e puer generell Punkten agoen, déi mir a menger grénger Fraktioun besonnesch um Häerz leien.

Fir d'Éischt e Wuert zu de Rapporten. Si weise ganz kloer, esou wéi och schonn déi aus de viregte Joren, dass d'Institutioun vum Ombudsmann an eppes méi wéi zéng Joer Existenz eng wichteg Kraaft hei am Land ginn ass. Den Ombudsmann als Vermëttler tëschent dem Bierger an dem Stat dréit ënner anerem dozou bei, dass d'Bierger méi einfach zu hirem Recht kommen, schléit Verbesserungen an administrative Prozesser oder der Gesetzgebung vir a kann doduerch aktiv Inegalitéite bekämpfen. Ech mengen, mir sinn eis all eens, fir ze soen, dass den Ombudsmann eng essenziell Institutioun an engem demokrateschen a rechtsstaatleche Land ass.

► **Une voix.** - Très bien!

► **M. Roberto Traversini (déi gréng).** - Zënter dass d'Madame Err d'Funktioun vum Ombudsmann vun hirem Virgänger iwwerholl huet, huet si aktiv dorunner geschafft, déi gutt Aarbecht, déi bis dohi geleescht gi war, weider ze verbessern, an zwar am Sënn vun nach méi enger grousser Accessibilitéit fir d'Bierger. Beispiller si méi intensiv perséinlech Kontakter mat de Leit, déi eng Reklamatioun eraginn, an awer och d'Veereinfachung vun der Sprooch, an där si hir Korrespondenz mat de Bierger gestalt. E kleng Geste mat grousser Wierkungen!

Ech perséinlech géif et sënnavoll fannen, wann och déi aner Administratiounen deem Beispill méi konsequent géifen nokommen. Well net selte sinn effektiv banal Verständnisproblemer um Ursprung vu Litigen tëschent Bierger an Administratiounen.

► **Une voix.** - Très bien!

► **M. Roberto Traversini (déi gréng).** - Da gëtt d'Madame Err sech grouss Méi, fir Problemer aus der Welt ze schafen, nach ier se zu engem Fall fir den Ombudsmann ginn. Dat erkläert dann och vläicht d'Zuel, dass déi erfogaangen ass. Zum Beispill, andeem se direkt eng informell an onbürokratesch Léisung mat de betroffenen Administratiounen sicht, ier de Fall formell an hire Servicer op den Instanze-

wee geet. Dës Approche ass sécherlech sënnavoll, well se eng séier Léisung vu ville Problemer erlaabt an den Administratiounen d'Geleeënheet gëtt, hir Prozeduren ze verbessern, ouni ëffentlech un de Pranger gestallt ze ginn.

Dës Fäll tauchen dann awer och net méi am Rapport annuel vum Ombudsmann op. Ech fannen dat éierlech gesot schued, dass dës Fäll net am Rapport genannt ginn. Ech géif gär hei d'Fro opwerfen, ob et net interessant wier, dës Fäll am Rapport ze integréieren oder op d'mannst eenzel Fäll méi genee ze presentéieren, well se fir gewëssen Dysfonctionnementer Verbesserungsméiglechkeeten opweisen.

Dëst si Froen, déi ech mer gestallt hunn a wou et sécher derwäert ass, eemol driwwer nozedanken.

Doriwwer eraus goufen et eng Partie Denksteiss an de Rapporte vun der Madame Err, déi am Kader vun enger Réévaluation vum Gesetz vum 2003 sollten ugaange ginn, notament fir d'Missioun vum Ombudsmann méi breet ze definéieren. Dës Fro gëtt jo scho méi laang diskutéiert.

D'Propos, déi mir als gréng Fraktioun och ënnerstëtzen, gesäit vir, dass den Ombudsmann soll iwwerall do kënne aktiv ginn, wou eng Missioun vum Service public assuréiert gëtt a wou ëffentlech Gelder fléissen, fir de Finanzement ze ënnerstëtzen. Dat kann am Beräich si vum Gesondheitswiesen, bei de Spideeler, beim ëffentlechen Transport, bei de Maison-re-laisen, bei private Schoulen a Lycéien.

Et ass awer jo eng kloer Ongerechtegkeet, wa verschide Bierger am Fall vun engem Konflikt mat engem Prestataire de service kënne op den Ombudsmann zrëckgräifen an déi aner net.

Beispiller gëtt et genuch a se goufen och, mengen ech, bal all hei opgezielt.

Et goufen natierlech scho kritesch Stëmmen aus der Privatwirtschaft, déi gesot hunn, dass et kéint zu enger ongläicher Konkurrenzsituatioun kommen, wa scho verschidden Entrepreneuren an e Kompetenzfeld vum Ombudsmann fallen an déi aner net. Dat ass eiser Meenung no kee valabelt Argument, well déi privat a konventionéiert Acteuren, déi eng Mission de service public erfëllen, ginn dee Moment jo awer all d'selwecht behandelt. An doduerch, dass se ëffentlech Gelder kréien, spille se souwiso an enger anerer Liga wéi déi aner, déi ebe keng Mission de service public assuréieren.

Schonn am Débat d'orientation iwwert de Rapport vum Médiateur am Joer 2012 war gesot ginn, dass d'Institutiounskommis-sioun den Op-trag sollt kréien, fir eng genee Definitioun vun der Notioun vum „service public“ ze liwweren. An där Definitioun soll d'Natur vum Service berücksichtegt ginn an de Prozentsaz vum ëffentleche Finanzement. D'Kombinatioun vun deenen zwee Elementer ass dann ausschlaggebend, fir d'Aschalt vum Ombudsmann méiglech ze maachen oder eben net.

D'Petitiounskommis-sioun huet sech virgeholl, sech geschwënn - ech hoffen op alle Fall! - mat der Institutiounskommis-sioun zesummenzesetzen, fir dës Fro ze diskutéieren an endlech e Schrëtt weiderzecommen an deem Chantier. Well soulaang dës Fro net beäntwert ass, ginn d'Bierger an zwou Kategorien agedeelt, wat hiert Recht op den Ombudsmann ugeet, an dat ass op Dauer net gutt.

Hei gëtt een duuschtereg.

(**Hilarité et interruptions**)

► **M. Gast Gibéryen (ADR).** - Huel lech Zäit!

(**Hilarité**)

► **M. Roberto Traversini (déi gréng).** - Merci, Här Gibéryen.

Zum Thema vun de Kompetenzfelder vum Ombudsmann ass ze bemierken, dass elo mam neie Gesetz iwwert d'Patientenrechter, dat mer jo eréischt virun e puer Wochen hei gestëmmt hunn, eng Médiationsinstanz fir de Gesondheitssektor geschaf gëtt. Dës Gesondheits-médiateur wier dann zoustänneg, fir d'Reklamatiounen aus dem gesamte Gesondheitssektor unzuhuelen, onofhängeg dovunner, ob et sech ëm e privaten oder e staatleche Prestataire handelt.

Dëst ass zumindest an der Theorie eng gutt Saach. Mir müssen d'Evolution vum där neier Médiationsinstanz opmierksam verfolge, fir ze kucken, ob se hiren Zweck erfëllt.

Och an anere Berufssparte ginn et ewell Médiatoren. Dës sektoriell Médiatioun ass sécherlech eng gutt Saach a schreift sech an déi jorelaang Beméiung vum eise Land an, alternativ Weeër zu Konfliktléisungen ze fannen, wéi just de Wee op d'Gerichter.

Ech muss allerdinges dozou bemierken, dass do nach Verbesserungsbedarf besteet, well net ëmmer agreéiert Médiatoren op dës Aufgab

gesat ginn. Dat ass iwwerengs och beim nei geschafene Gesondheitsmédiateur de Fall, wou am Gesetzestext net explizit en agreéierte Médiateur virgesinn ass. Dat war esou gewollt, mä mir sollten trotzdeem an e puer Joer eng Evaluatioun maachen, fir ze kucken, ob dës Décisioun déi richteg war. Op jidde Fall hu mer elo mam Unistudium a mam Gesetz iwwert de Médiateur agréé d'Rahmbedéngunge geschaf, fir de Bierger an héichwäertege Service am Beräich Médiatioun kënne unzibidden.

Och hei am Beräich vun der professioneller an interprofessioneller Médiatioun huet d'Madame Err mat ugepaakt a gehollef, ee Krees vu Leit opzebauen, déi an hire jeeweilege Berufssparte Médiationsstrukture schafen oder wäerte schafen. Dës Architekten, Dokter, Affekote maachen d'Formatioun, fir kënne als Médiateur ze schaffen. Mir begrëssen dës Initiativ an hoffen, dass se sech an Zukunft wäert positiv weiterentwëckelen.

(**M. Mars Di Bartolomeo reprend la présidence.**)

Da wëlt ech hei e puer méi kuerz Sätz verléieren iwwer en anere Punkt, an deem mir als Petitiounskommis-sioun wäerten deemnächst trancheiere mussen: d'Fro vun der offizieller Denominatioun. Zur Wiel stinn: „Ombudsman“ mat just engem N, „Ombudsmann“ mat zwee N, „Ombudsfra“, „Ombudsperson“, „Ombudsinstanz“, „Médiateur“, „Médiatrice“, „Ombudsmédiateur“. „Knoutermann“ oder „Knouterfra“ sinn och ganz sympathesch Proposen, déi allerdinges net wierklech d'Missioun vun ëffentleche Médiateur ermëspigelen.

Um Internet fënnt een d'Madame Err iwwerengs ënnert dem „www.ombudsman.lu“, am Géigesaz zum urspringlechen Term „Médiateur“ aus dem Gesetzestext vun 2003. Dat war, mengen ech, hunn ech op alle Fall emol gesot kritt, dem Här Fischbach seng perséinlech Initiativ, fir dësen Term ze iwwerhuelen.

D'Argument, dass den Term „Médiateur“ oder „Médiatrice“ zu Konfusiounen ka féieren, kann ech aus perséinlecher Erfahrung bestätegen. Ausserdem schéngt et mer wichteg, an der offizieller Denominatioun och déi institutionell Médiatioun vun der ziviler ze ënnerscheede respektiv se ervirzehiewen.

Déi gréng Fraktioun ass der Meenung, dass déi bescht Léisung ëmmer nach déi aktuell Denominatioun ass: „Ombudsman“ mat engem N. Den Term kënnt urspringlech aus Schweden, wou d'Institutioun vum Ombudsmann eng Jorhonnerten al Tradition huet. Do gëtt den Term och gläich, geschlechtsneutral verstanen, onofhängeg ob grad e Mann oder eng Fra dëst Amt ausübt. Den Term ass international bekannt a beschreift och iwwerall déiselwecht Missioun: d'Vermëttel bei Konflikter tëschent Bierger an Administratiounen.

Wéi gesot, dës Fro wäert geschwënn ofschléissend an der Petitiounskommis-sioun diskutéiert ginn. An ech si gespaant, wéi mer d'Madame Err an hir Successeuren an Zukunft wäerten urieden.

Zum Code de bonne conduite administrative wëll ech just nach eemol dee fir eis wichtigste Punkt ervirhiewen, deen nämlech den Artikel 41 vun der Mënscherechtscharta soll ermëspigelen. Dës gesäit ënner anerem vir, dass all Bierger d'Recht dorobber huet, dass seng Uleissen op eng onpartiesch an équitabel Aart a Weis traitéiert ginn, an zwar an engem rasonablen Délai. De Code de bonne conduite ass e wichteg Instrument, fir de Service um Bierger ze verbessern, a gëtt schonn zënter Joren erwaart.

En anere Punkt, deen ech wëll uschwätzen, ass d'Maison des Droits de l'Homme oder de la personne humaine. Ech si frou feststellen, dass dës Projet gutt weiderkënn, och wa mer dat passend Gebai fir dës nei Strukturen nach net fonnt hunn; ausser mir kriteen elo gesot, dass et net esou wier.

Bei deemem Projet geet et jo drëms, dass all Organisatiounen, déi sech ëm d'Défense vun de Mënscherechter an der Chancëgläichheet këmmen, wéi de Centre pour l'égalité de traitement, d'Commission consultative des Droits de l'Homme, den Ombudscomité fir d'Rechter vum Kand an - firwat net? - och deene neie Gesondheitsmédiateur - dat wier nach ze kucken - raimlech zesummege-sat ginn an esou hir Aktivitéite besser kënne mateneen ofstëmmen.

Och den Ombudsmann géif hei d'Zelter op-schloen a mat dëse Gremien zesummeschaffen. Och fir de Bierger ass et duerch esou ee Guichet unique méi einfach, dee richteg Service ze fannen, zum Beispill duerch ee gemeinsamen Accueil. Gläichzäitig wier dës Maison des Droits de l'Homme d'Antwort op d'Fro, ob den Ombudsmann sollt explizit zoustänneg si fir d'Défense vun de Mënscherechter. Dat gouf jo och an deene leschte Jore vill diskutéiert. D'Antwort ass fir eis eendeitig neen. Engersäits, well de Médiateur dës Kompetenz impli-

zit souwéiso huet. All Bierger kann de Médiateur saisieren am Fall vun engem Netan-hale vun der Konventioun oder vu Gesetzter.

Anerersäits fannen ech, dass jiddwereen dat sollt maachen, firwat en zoustänneg ass a wou e seng spezialiséiert Leit huet. Wann et Iwwerschneidunge ginn, gëtt natierlech och do zesummege-schafft. Mä den ORK, deen ass de Spezialist fir d'Rechter vum Kand, d'CCDH ass de Spezialist a Saache Mënscherechter an esou weider.

Dass mir d'Missioun vum Rapporteur national iwwert de Mënschenhandel ufanks des Joers der CCDH zougesprach hunn, war jo och schonn e Schrëtt an dës Richtung vun enger klorer Opdeelung vun de Kompetenzen.

Am Fall vun der Commission consultative des Droits de l'Homme kann een d'Fro opwerfen, ob et wënschenswäert ass, hiert Mandat ze erweideren, well se bis elo eng exklusiv konsultativ Missioun huet an net kann op d'Plainté vun eenzelne Persounen agoen.

D'Attributioun vum Ombudsmann fir d'Rechter vun de Behënnerten, déi d'Madame Err sech am Moment mam Centre pour l'égalité de traitement an der Commission consultative des Droits de l'Homme deelt, sollt an eisen Aen och ee klaren Usprechpartner hunn. D'Interpretatiounsproblemer vun den Texten an e Mangel un technescher Kompetenz am Service vum Ombudsmann maachen et doriwwer eraus der Madame Err immens schwéier, an deemem Beräich effizient ze schaffen.

Sollt et nach aner Beräicher ginn, déi vu kenger Instanz aus der Maison des Droits de l'Homme ofgedeckt gëtt, mussen mer dat natierlech behiewen. Mir hoffen also, dass dëst Haus geschwéiert seng Dieren opmaachen an e strukturiert a konstruktiv Schaffen ermëglicht.

An enger zweeter Phas wier et dann och sënnavoll, dass sämtlech Gremien, déi an der Maison des Droits de l'Homme doheem sinn, der Chamber ënnerstinn an hir Rapporte mussen maachen.

Gläichzäitig wier et dann awer och un eis, eis ferm Gedanken doriwwer ze maachen, wéi mer vun eiser Säit aus d'Zesummenaarbecht mat dëse Gremien an Zukunft verbessere kënne. Do gëtt et sécherlech nach Sputt no uewen.

Här President, Dir Dammen an Dir Hären, domadder sinn ech zum Schluss komm. Merci fir d'Nolauschteren, Merci un lech all a Merci un d'Marion.

► **Plusieurs voix.** - Très bien!

► **M. le Président.** - A Merci och un den Här Traversini. Nächste Riedner ass den Här Gast Gibéryen. Här Gibéryen, Dir hutt d'Wuert.

► **M. Gast Gibéryen (ADR).** - Merci, Här President. Léif Kolleeginnen a Kolleegen, ech wëll vun eiser Säit aus och deenen zwee Rapportere, dem Kolleg Marcel Oberweis an dem Kolleg Marco Schank, Merci soe fir hir Rapporten. Et ass fir d'Éischt, dass mer zwee Rapporten hei zesummen hunn. Mir wëssen, dass et méi flott wär, wa mer een hätten. Mä den Émstänn no, déi mer d'lescht Joer haten, ass et awer normal, dass mer dës Kéier hei déi zwee Rapporte mateneen diskutéieren.

Et ass kloer, wann een als fënneften an dëser Rei drukënn, dass een net méi vill Neies kann zu esou engem Rapport zielen. An ech wëll awer drop hiweisen, dass et wichteg ass, dass mer déi Diskussioun hei féieren, an ech kommen herno nach eng Kéier dorobber zrëck.

Ech mengen, all Joer mécht de Médiateur eis an der Chamber hei an ëffentlecher Sitzung säi Rapport. Dann ass eis Petitiounskommis-sioun dermat befaasst an et ginn dann an déi eenzel Fachkommis-siounen déi Deeler transferéiert, déi si betreffen, an dann hunn déi Kommis-siounen eng Sitzung mat deem zoustännegem Minister a mat de responsabele Fonctionnaires, wat eng gutt Prozedur ass, woumadder och de Suivi garantéiert gëtt vun deene Recommendationen oder deene Kritiken, déi vum Ombudsmann kommen, an een dann och gesäit, dass dat hei an der Chamber net als en einfache Rapport klasséiert gëtt, mä dass et e Suivi gëtt an der Chamber, dass d'Chamber sech an deenen eenzelne Kommis-siounen ëm déi eenzel Punkte bekëmmert, wéi gesot, mam Minister zesummen an dann dann ofschléissend dozou hei an der Chamber en Débat ass, wou, wann dann nach Saachen géifen opstoen, oder vun deenen ee mengt, déi missten an den Débat public hei afléissen, déi dann hei kënne zur Diskussioun kommen.

Ech mengen, wéi 2003 d'Gesetz geschaf ginn ass vum Ombudsmann, déi deemools derbäi waren an haut nach heibanne sëtzen, wëssen, dass et net esou eng Selbstverständlechkeet war, dass deemools déi liddi vum Ombudsmann op eng relativ deelweis dach awer grouss Kritik gestouss war. Virun allem och an der





Fonction publique selwer ass se op eng Kritik gestouss, well do Leit gefaart hunn, datt ebe mat där Institutïoun, déi do nei geschafte géif ginn, virun allem eng Juegd op si opgemaach géif ginn, wat ee jo awer an der Zäit elo festgestallt huet, datt dat kengesfalls de Fall ass, mä datt dat ergänzend ass. An ech géif souguer mengen, datt haut vill Leit frou sinn, och aus deem Secteur, datt mer déi Institutïoun age-riicht hunn, well eben och ewell eng Rei vu Problemer geléist gi sinn, wat si sécherlech méi wéi arrangéiere wäert.

Et war net einfach, fir esou eng Institutïoun opzebauen. An ech mengen, mir wëssen alleguer, wéi de Marc Fischbach deemools déi éischt Fonctioun do iwwerholl huet, datt deem och net onëmstridden am Ufank vu sengem Mandat war, mä mer awer zum Schluss alleguer heibannen, wéi de Marc Fischbach opgehalen huet, mengen ech, unisono him konnte Merci soe fir déi gutt Aarbecht, déi hie während all deene Jore gemaach huet, an dofir, datt hien dat aus der Institutïoun vum Ombudsmann gemaach huet, wat se haut ass a wéi se Unerkennung am ganze Land fënnt, bei de Leit, bei de Verwaltungen. Do gétt eng gutt Aarbecht gemaach, an et denkt haut kee méi drun, datt een esou eng Institutïoun sollt a Fro stellen, mä et ass eppes, wat haut zur Normalitéit an eisem Stat gehéiert.

Wéi d'Madame Err 2012 den Ombudsmann iwwerholl huet, ass se natierlech dunnt an e bësse méi stiermesch Zäiten erakomm. Dat ass normal, wann een neien Här an d'Haus kënnt. Et soe vill Leit: „Eng nei Biischt, déi kiert besser.“, da kommen nun emol ebe Problemer op. A mir hate relativ vill Problemer an deenen éischte Méint, Konflikter intern an der Verwaltung tëschent dem Ombudsmann a senge Beamten, souwuel wat den Émgang tëschentenee wéi d'Gestioun ubelaangt.

Heiansdo hat een esou zäitweilig d'Gefill, wéi wa mer missten nach en zousätzlechen Ombudsmann astellen, deen tëschent dem Médiateur an de Mataarbechter aus dem Ombudsmann senger Verwaltung misst schlichten. Dat huet d'Chamber missen zum Deel maachen, well mer vun där enger wéi vun där anerer Säit dermat konfrontéiert gi sinn. A fir de Bureau war et sécherlech net esou einfach, fir ëmmer dann do dee Wee ze fannen, deen derzou gefouert huet, datt déi Institutïoun dach kee Schued no bausse kritt.

Et ass kloer, datt, wann eng Institutïoun wéi grad den Ombudsmann, dee jo awer an den Ae vun de Leit do ass, fir ze schlichten, fir Problemer, déi tëschent Bierger a Verwaltungen stinn, fir déi kënnen ze schlichten, fir déi aus der Welt ze schafen, wann dann an där Institutïoun selwer Problemer entstinn, an datt dann eng drëtt Institutïoun, d'Chamber an deem Fall, mat erugezu ginn ass, fir eben do ze hëllefen ze schlichten. Et ass an der Zwëschenzäit méi roueg ginn. Intern héiert een zwar, datt d'Problemer nach net all geléist gi sinn. Mä et kann ee just wënschen, datt och do Weeër fonnt ginn, fir datt déi Institutïoun awer esou funktionnéiert, wéi een dat kann dervu verlaangen.

Wat d'Aarbecht awer ubelaangt, ech mengen, dat sollt een awer kloer soen, déi huet dorënner Gott sei Dank net gelidden. Ech mengen, aus de Rapporten eraus kann een dat feststellen, datt all déi Problemer, déi erugedroe gi sinn, datt och d'Verhältnis vun deene Problemer, déi erugedroe gi sinn an déi geléist gi sinn, datt dat an enger gudder Kontinuitéit ass. An dofir, mengen ech, sollt een och, trotz all deene Problemer, déi do bestanen hunn, souwuel dem Ombudsmann, der Médiatrice, wéi och de Leit, déi do schaffen, eise Merci an eis Unerkennung zum Ausdrock brénge fir déi Aarbecht, déi dach awer gutt an deene Joren do gemaach ginn ass.

Ech wëll hei net op eng Rei vu Punkten oder Recommendatiounen agoen. Ech wëll just eppes mat an d'Diskussioun erabréngen. An et ass de Mëtteg hei schonn e puermol ugeklongen, datt an der Petitiounskommissioun hei an der Chamber och op Initiativ vun dem Ombudsmann drop higewise ginn ass, datt dat Gesetz vun 2003, nodeem et elo zéng Joer al ass, awer erëm soll op de Leescht geholl ginn an datt soll nei iwwer punktuell Reformen an deem Gesetz do nageduecht ginn.

Ech wëll hei soe vun eiser Säit aus, datt mer, wéi virdru schonn erkläert, fir den Ombudsmann sinn, déi Institutïoun, an datt déi och all hir Méiglechkeete muss kréien, fir déi Aarbecht kënnen korrekt ze maachen. An dofir, mengen ech, wier et scho wichtig, a verschidde Virriedner hunn dat hei gesot, wa verschidden Terme géife preziséiert ginn, fir datt den Terrain, wou se kann a wou se net kann, datt dat sollt preziséiert ginn. An, ech mengen, et gétt vu verschiddene Säite méi positiv an och méi kritesch gesinn. Mir sollen eis also Zäit huelen an eis wierklech gutt domadder ausenanesetzen, fir eben de Respekt ze kréien, datt den Ombuds-

mann engersäits d'Aarbecht richtig maache kann an datt op där anerer Säit d'Prinzipie vum Rechtsstat och respektéiert ginn.

Et ass also kloer, an dofir géif ech drop zrëckweisen, wann déi zoustänneg Commissioun hir Aarbecht ophëlt, datt se dann och soll de Brëif op de Leescht huelen, deen den Här Alain Thorn, de Juge directeur vum Tribunal vun der Jugend, eis den 10. September 2012 geschriwwen huet. Dëse Brëif, dee vum 10. September 2012, wéi gesot, datéiert, ass vu grondleeënder Wichtigkeet eiser Meenung no, wann ee sech fir de Fonctionnement vun eisem Rechtsstat interresséiert.

Den Auteur verdeedegt a sengem Brëif op eng ganz engagéiert a gutt argumentéiert Manéier de Secret professionnel an de Secret médical. Hie mécht virun allem op eng Rei vu grondsätzlechen Iwwerleeungen iwwert d'Institutïoun vum Ombudsmann, déi jo och eng politesch Komponent huet, opmierksam, an dat besonnesch am Kontext vun der Onofhängegkeet an dem eegene Kompetenzberäich vun der Justiz.

Et muss och ënnerstrach ginn, datt dee Brëif bis haut näischt u senger Aktualitéit verluer huet. Den aktuellen Ombudsmann mécht sech a sengem Rapport d'activité vun 2011-2012 derfir staark, datt den Ombudsmann nach soll bedeitend méi Kompetenze kréien. Besonnesch déi Fuerderung, datt den Ombudsmann soll eng Compétence générale hunn an dat als Institution extraordinaire an dat och nach besonnesch am Beräich vun de Mënscherechter, wërft eng ganz Rei vu Froen op, déi och schonn de Mëtteg vun anere Virriedner hei ugeschnidde gi sinn. Déi Fuerderunge sollten op jidde Fall ganz kritesch a besonnesch och am Liicht vun dem Här Thorn sengem Schreiwes a sengen Observatiounen vun deemools analyséiert ginn.

Ech wëll och drop hiweisen, datt an deem Kontext parlamentaresch Froe gestallt gi sinn, souwuel vum Kolleg Gilles Roth, wat de Secret professionnel ubelaangt, wéi vu mengem Parteikolleg Fernand Kartheiser, wat de Secret médical ubelaangt. Eiser Meenung no muss deen an alle Fäll respektéiert ginn a bleiwen.

Här President, léif Kolleeginnen a Kolleegen, dat waren e puer Bemerkungen, déi ech vun eiser Säit aus wollt zu deem Débat bäidroen.

Ech soen lech Merci.

► **M. le Président.**- Merci och dem Här Gibéryen. Als leschte Riedner ass den Här Justin Turpel ageschriwwen. Här Turpel, Dir hutt d'Wuert.

► **M. Justin Turpel (déi Lénk).**- Här President, Dir Dammen an Dir Härën, léif Kolleegen, ech wëll net méi op all eenzel Léit agoen oder op all déi Zuelen, no all deem, wat mer schonn héieren hunn. Ech wëll e puer grondleeënd Saachen ervirsträichen. Dat Éischt, wat ech wëll ervirsträichen, datt ass d'Wichtigkeet vum Médiateur fir d'Bierger, fir d'Usagere vun eiser Verwaltung. De Médiateur ass eng wichteg Hëllef fir eis Bierger an et soll een dem Médiateur an och sengem Personal ausdrécklech Merci soe fir déi Hëllefleeschtung, déi se de Bierger engéintbréngen.

De Médiateur ass net, wéi dacks gemengt gétt, een Affekt vum Bierger. De Médiateur ass och net ee Richter, an en hëlt och keng Décisiounen, a virun allem ass de Médiateur och net een Accusateur vun der Verwaltung. De Médiateur ass do, fir ze erliichteren, den Dialog ze erliichteren a fir Léisungen ze sichen, déi fir déi zwou Säiten akzeptabel sinn an op enger rechtlecher Basis geschéien.

Doraus ergëtt sech fir mech een zweete Punkt, dee vläicht net ëmmer kloer genuch ervirgestrach gétt: d'Wichtigkeet vum Médiateur net nëmme fir de Bierger, mä d'Wichtigkeet vum Médiateur fir d'Verwaltung.

Eng Médiatioun, esou wéi mer se zu Lëtzebuerg kennen, ass am Intérêt vun der Verwaltung a vum ëffentlechen Déngscht, well si Intérêt drun hunn, datt mer Léisungen fannen am Fall vu Konflikter. Och wann de Médiateur d'Recht huet, fir Enquêtes ze maachen an Investigatiounen ze maachen, ass en net de Feind vun der Verwaltung an och net den Ukläger vun der Verwaltung. En ass deen, dee Léisung sicht fir Konflikter. An déi Léisungen, déi droen och derzou bäi, datt d'Vertrauen an d'Verwaltung gestärkt gétt.

Am Géigesaz zu der privater Médiatioun, déi voraussetzt, datt déi zwou Säite mat enger Médiatioun d'accord sinn, si mer an der ëffentlecher Médiatioun an der Situatioun, datt de Stat net gefrot gétt, ob en d'accord ass, mä datt et eng Obligation légale ass, fir mussen d'accord ze sinn. Ob awer all Statsverwaltungen sech ëmmer esou verhalten, datt se am Fong geholl d'accord si mat der Médiatioun, dat steet op engem anere Blat.

Ech mengen awer, datt et wichtig wier, datt eis Verwaltungen - dat ass een Appell, deen

een onbedéngt sollt lancéieren an ënnersträichen - matschaffe beim Siche vun de Léisungen. Well meeschtens sinn d'Ursaache vu Konflikter mam Bierger a mat der Verwaltung net einfach just iergendee schlechte Wëllen, mä ganz dacks sinn déi Ursaachen zum Beispill an de Ressourcen, déi d'Verwaltungen hunn, fir hir Aarbecht, hir Déngschtleeschungen iwwerhaupt kënnen ze maachen: net genuch Personal, net genuch Informatik oder soss Moyenen, fir déi Aarbecht uerdentlech ze maachen, ganz dacks Formatiounen, déi se gäre géife maachen an net konnte maachen.

En anerem Niveau vun Ursaachen ass ganz dacks d'Interpretatiounsméiglechkeet, déi a verschiddene Virschreften, gesetzleche Virschreften läit, déi ënnerschiddlech interpretéiert ginn. An an deene Situatiounen ass et wichtig, datt een een Aussestehenden huet, an dat ass d'Aufgab vum Médiateur, fir ze proposéieren, wéi ee kéint d'Prozeduren upassen, fir ze proposéieren och, wéi ee kéint d'Gesetzter änneren.

An dowéinst ass et jo esou, datt de Médiateur habilitéiert ass, fir Recommendatiounen ze maachen, déi mer solle seriö huelen, souwuel als Chamber, mä och als Stat a Verwaltungen, well se am Intérêt vun deenen zwou Säite sinn. Well och déi Recommendatiounen jo drop erauslafen, datt mer preventiv verhënnere, datt e Fall sech widderhëlt, datt sech Konflikter widerhuelen, andeem mer déi Upassungen kréien an de Verwaltungen an der Interpretatioun, déi mer brauchen.

Et ass och wichtig, datt mer déi seriö huelen, well mer doduerjer grad d'Vertrauen an déi ëffentlech Déngschtleeschung, déi eis wichtig ass, erëm herstellen oder verbessern a mer och zu der Verbesserung vun der Qualitéit vun der ëffentlecher Déngschtleeschung bäidroen.

Iwwerhaupt ass et wichtig, datt am Virfeld vu Konflikter agéiert ka ginn. An do wëll ech zwee Aspekter opwerfen, déi bis elo op déi Aart a Weis, mengen ech, nach net opgeworf gi sinn.

Dat Éischt ass dee vun der Roll vum Personal an der Verwaltung oder d'Noutwendegkeet vum Vertrauen an d'Personal, fir d'Personal mat erunzezéien, fir am Virfeld Konflikter ze verhënnere. D'Personal, dat si ganz dacks déi, déi d'Erfahrung hunn an déi wëssen, wou d'Problemer leien, an déi och ganz dacks Virschléi hunn. Et si ganz dacks déi, déi kënnen soen, datt zum Beispill weinst Problemer vu Ressourcen, vun Unugepasstheet vu Prozeduren oder Informatiksprogrammer Konflikter sech ubahnen, déi ee ka verhënnere, wann een d'Personal seriö hëlt.

Dowéinst mengen ech och, datt mer an eisen ëffentleche Verwaltungen, net nëmme bei de Gemengen, mä och beim Stat demokratesch gewielte Personalverriedungen bräichten, déi mer de Moment bis elo nach net hunn.

En zweete Partner an deem Ganzen, dee grad esou wichtig muss geholl gi wéi d'Personal, dat sinn d'Bierger selwer, d'Usageren. Ech mengen, et ass wichtig, datt mer d'Rechter vun den Usagere vis-à-vis vun der Verwaltung stärken an eng Partnerschaft zwësche Bierger a Verwaltungen institutionaliséieren, déi zesummen de Reklamatiounsregëster zum Beispill opschaffen a kucken, wat d'Ursaache sinn, déi zesumme kënnen Verbesserungsvirschléi definéieren, fir eis ëffentlech Déngschtleeschungen an eis Verwaltung ze optiméieren.

Ech wëll kuerz agoen op déi fënnef Propositionen, déi de Marco Schank als President vun der Petitiounskommissioun als Rapporteur schonn duergeluecht huet, déi d'Petitiounskommissioun hei proposéiert an déi mir och ënnerstëtzen.

Déi éischt Proposition ass ganz kloer déi, déi schonn e puermol ervirgestrach ginn ass, nämlech, no zéng Joer Gesetz e Bilan ze maache vun den Erfahrungen an d'Gesetz unzepassen. Do sinn dräi, véier Froen, déi ëmmer erëm ervirgestrach ginn an déi mir och wichtig sinn.

Dat Éischt ass de Kompetenzberäich vum Médiateur. Ech schwätzen elo net, wat d'Beräicher ugeet, mä ech schwätzen innerhalb vun de Beräicher, datt am Moment d'Kompetenz beschränkt ass op déi ëffentlech Betriber. An ech mengen, et ass e puermol hei illustréiert ginn um Beispill vu Kliniken, vu Crèchen. Et kann net sinn, datt den Usager, wa säi Kand..., oder wann e Patient ass an enger ëffentlecher Klinik, datt en da vum Médiateur ka gehollef kréien, a wann dat eng privatrechtlech Struktur ass, soit, souguer wa se konventionéiert ass, datt de Médiateur do außen vor ass.

Mir müssen dat ausbauen. An ech mengen, och déi Fro vun den Definitivitéiten vun den ëffentlechen Déngschtleeschungen, mer müssen oppassen, datt dat net eng Ursaach gétt, fir et auszeweiden. Well déi Fro: Wat ass eng ëffentlech Déngschtleeschung? - ass ganz vill diskutéiert ginn an Europa, och zu Lëtzebuerg. An ech mengen, et misst relativ einfach sinn, fir

déi Beräicher opzezielen, vun deene mer der Meenung sinn, datt de Médiateur muss fir se zoustänneg sinn, egal, ob et een ëffentleche Betrib ass oder ob et ee private Betrib ass, deen déi ëffentlech Déngschtleeschung do ubitt.

Mir sollen d'Beräicher opzielen, an et geet sécherlech net, well dat ass eng Gefor haut grad am Zäitalter vun der Liberaliséierung, ëm d'Aart a Weis, wéi d'Déngschtleeschung erbruecht gétt. Et ass net d'Aart a Weis vun den Déngschtleeschungen, déi determinant soll sinn, ob de Médiateur zoustänneg ass, mä et soll ëm d'Beräicher goen. An do solle mer keng Differenz méi maache zwëschent ëffentlechen, ëffentlech-rechtlechen a privatrechtleche Betriber, déi déi Déngschtleeschung bidden.

Een zweete Punkt, deen ëmmer erëm opgeworf gétt, dat ass, datt, wann de Médiateur befaasst ass, doduerjer een Délai suspensif sech soll ergi fir e Recours beim Geriicht. Ech mengen, dat läit op der Hand.

An dat Drëtt, wat ëmmer ugeschnidde ginn ass, wat och vu mengem Virriedner nach ugeschnidde ginn ass, dat ass d'Fro vum Secret médical, bancaire, fiscal, wou ech net der Meenung si vu mengem Virriedner a wou jo och schonn eng Deelléisung do ass, nämlich datt de Secret médical dem Médiateur, fir de Fall, mat deem e befaasst ass, net opposabel ass. An ech géif mech dergéint wieren, datt en op eemol géif opposabel gemaach ginn. Ech mengen, dat nämlich misst stëmme fir de Secret bancaire an de Secret fiscal. Mä sécherlech muss dat gekläert ginn, wa mer d'Reform vum Gesetz entaméieren, déi mer net ze spët sollen erausschieben, mä déi am Hierscht soll ufänken.

Och déi aner Froen, déi sech stellen iwwert den Numm „Médiateur“, „Ombudsman“ an esou weider sollen do gekläert ginn. Ech hunn och Problemer mat deem komplizéierten Numm, mä ech mengen, datt et awer och net evident ass, fir ee Médiateur Ombudsmann ze nennen, well en Ombudsmann normalerweise aner Kompetenzen huet. Dee kann Décisiounen huelen, dat ass jo generell de Fall. A mir sollen engem net een Numm ginn, deem en net ka Rechnung droen.

Déi zweet Proposition vun der Petitiounskommissioun bezitt sech op déi Recommendatioun Nummer 49 vum Médiateur, wat d'Noutwendegkeet vun engem Code de bonne conduite oder vun engem Guide de bonnes pratiques administratives ugeet. Ech mengen, dat ass absolut noutwendeg. Et ass absolut noutwendeg.

An och e Code de bonne conduite an e Guide de bonnes pratiques administratives, déi d'Aart a Weis kloerstellen, wéi d'Verwaltungen solle fonctionnéieren a sech verhalten, wenn se net géint d'Personal, mä och esou ee Code ass am Intérêt vum Personal.

Iwwregens kann esou ee Code nëmme gemaach ginn, wa mer de Code de déontologie emol fäerdeg hunn a wann d'Missiounen och gekläert sinn, souwuel d'Missiounen allgemeng wéi, sou wéi mer dat virgesinn hunn an der Reform vum Statut, och d'Missiounen an de Verwaltungen, wann déi mat de Leit zesumme gekläert ginn, fir datt jiddweree sech bewosst ass, wat déi Missioun sinn, wat de Code de déontologie ass. An dann ass et méiglech, fir esou ee Code de bonne conduite opzustellen.

Ech wëll einfach drop hiweisen, firwat datt dat sech net géint d'Personal wennt. Am Gemengesector beispillsweis, wou ech eng Zäitchen awer aktiv war, ass dat eng Ufro vum Personal a vun de Gewerkschaften, fir esou e Code de bonne conduite an e Guide de bonnes pratiques administratives ze maachen, well se einfach soen: Doraus ergi sech Obligationen net nëmme fir d'Personal, wat weess, wou et drun ass. An ech gesinn de Syvicol-President an ech mengen, et gétt och en Accord zwëschent de Gewerkschaften an dem Syvicol, fir esou ee Code de bonne conduite ze maachen an e Guide de bonnes pratiques ze maachen.

Ech wier frou, wa mer kéinten an déi Richtung goen, well doraus ergi sech net nëmmen Ufuerderungen un d'Personal, mä et ergi sech och Ufuerderungen un d'Verwaltung an un d'Direktiounen, déi mussen dann och déi Moyenen zur Verfügung stellen, déi ee Beamte beispillsweis brauch, fir kënnen eng uerdentlech Aarbecht ze maachen. An och dat geet Hand an Hand an dat solle mer seriö huelen.

Déi drëtt Proposition ass déi vun den Zoustännegkeetsberäicher, op déi ech aus Zäitgrënn elo net méi ze vill well agoen. Ee Médiateur kann net alles maachen. Dat hu mer gesi bei der Santé, déi mer jo un aner Instanzen ginn hunn. Woubäi een awer muss drop hiweisen,





datt all Médiateur déi Kompetenze brauch, fir a sengem Beräich kënnen ze schaffen, an de Médiateur am Santésberäich, dee brauch sécherlech net virun allem juristeschen Kompetenzen, oder net nëmmen, mä dee brauch och medezineschen Kompetenzen. Ähnlech ass et an anere Beräicher - CET, Handicapéierter -, wou mer an deene Strukture grouss Kompetenzen hunn a wou déi Kompetenze solle genotzt ginn, wou spezifesch Kompetenze solle genotzt ginn, fir do och déi Médiatiounsstrukturen ze schafen, déi mer brauchen.

Eppes, wat virdrun opkomm ass, dat ass, datt d'Erweiterung vun de Kompetenzen op privatrechtlech Betriber contraire wier zu der Erweiterung..., oder zu dem Netwëllen, fir sech an all Beräich anzemëschen.

Neen, ech gesinn dat esou, dat sinn zwou verschidde Saachen. Dat eent huet iwwerhaupt näischt domat ze dinn. Dat eent ass: A wéi enge Beräicher ass de Médiateur zoustänneg? An dat anert ass: A wann en zoustänneg ass, datt en dann och zoustänneg ass souwuel fir ëffentlech wéi fir privatrechtlech Betriber, déi an deem Beräich tätég sinn. Dat ass eng Konfusioun, déi net ubrecht ass.

Déi véiert Proposition, dat ass déi, datt de Médiateur gläichzäiteg zu enger juristescher Prozedur soll kënnen seng Aarbecht maachen, well wann en dat net mécht, mussen d'Leit schonn op d'Gericht goen, wann d'Délaien..., oder e kann derzou bäidroen, datt eng Léisung kennt, ier d'Gericht eng juristesche Léisung muss fannen. D'Suspensioun vun dräi, véier Méint dréit derzou bäi, datt d'Leit net mussen onnéideg Gerichtenkäschten engagéieren, ier et noutwendeg ass.

Mir kënnen dat doten... Et sinn eng Rei Saachen, déi mussen am Gesetz geännert ginn. Et muss net alles duerch d'Gesetz geännert ginn. Villes léisst sech och duerch de bon Sens a gudde Wëllen änneren.

Dozou gehéiert och d'Proposition Nummer 5 vun der Kommissioun, nämlech d'Délaien an d'Aart a Weis vun den Äntwerte vun de Verwaltungen. Ech mengen, bei der Verwaltung gëtt et einfach déi zwee Extremere, well déi eng Verwaltungen, dat sinn déi, déi extrem hëllefseer sinn, an dat anert, dat sinn déi, déi extrem resistent sinn, fir Léisungen ze sichen, an ëschter refuséieren oder ëschter op hire Propositionen campéieren.

Ech wëilt och nach eng Kéier drun erënneren, de Médiateur ass net de Feind vun der Verwaltung; en ass deen, deen hëlleft, Léisungen sichen. An do sollen d'Verwaltungen, wa se mam Médiateur konfrontéiert sinn, wann ech gelift derzou bäidroen, datt déi Argumenter, déi virgeluecht ginn, datt déi solle weiderentwéckelt ginn an d'Dossiere solle weiderentwéckelt ginn, a se solle sech net einfach op Positionen do campéieren.

Als leschte Punkt wëll ech e puer Froen opwerfen, déi elo direkt net behandelt gi sinn, déi awer menger Meinung no wichteg sinn. Dat Eischt, dat ass, och wéi mer an de Chamberskommissionen d'Diskussionen féieren, wou een d'Impressioun huet, datt d'Verwaltung ganz dacks gehéiert ginn, well dat eben och normal ass an üblech ass an déi och in extenso gehéiert ginn, an d'Meenung vum Médiateur do heiansdo awer ze kuerz kennt. Mir musse kucken, wéi eng Moyenen datt mer eis ginn an de Fachkommissionen, fir déi Diskussionen méi équitabel ze féieren a fir dann do déi verschidde Meenungen gläichberechtegt, am Sënn vun enger Léisungssich, kënnen do anzebréngen.

Déi zweet Saach, déi ech nach wëll opwerfen, dat ass den Droit d'avis, deen de Médiateur soll kréien, deen och scho vun anere Virriedner ugeschwat ginn ass. Dee schéngt mer einfach wirklech wichteg ze sinn, datt de Médiateur zu Sujeten, déi säin Tätigkeetsfeld betreffen, soll d'Méiglechkeet kréien, fir selwer Avisen

ofzeginn. An d'Chamber soll och drun denken, fir en dacks am Virfeld emol mat Saachen ze befaassen, déi en awer eppes uginn.

Mir an de Kapp kennt zum Beispill elo de Code de déontologie, dee mer an der Fonction-publiques-Kommissioun amgaange sinn ze diskutéieren, deen awer ee Kader gëtt herno fir de Code de bonne conduite. An et wier heiansdo wichteg, datt een de Médiateur do am Virfeld géif befaassen.

Deen drëtten Punkt, deen ech nach wollt opwerfen, dat ass deen, datt mer amgaange sinn, eng Verfassungsreform ze maachen, an datt ee wirklech och haart soll driwwer nodenken an och driwwer schwätzen, ob een d'Médiatioun an och d'Recht vum Bierger op d'Médiatioun net sollt verfassungsméisseg verankeren als eent vun de Rechter, wat een awer als Bierger soll zu Lëtzebuerg hunn.

Wann de Félix Eischen virdru gesot huet, mir hätte manner Dossierien, dat wier, well d'Leit manner géife knouteren oder, ech hat e bëssen esou verstanen, d'Médiature net méi esou gutt...

### (Interruption)

...net méi esou gutt géif schaffen, hunn ech et bal verstanen, wëll ech awer soen, datt ech domadder net kann d'accord sinn. D'Problemer, déi ëmmer erëmkommen, soll ee prinzipiell léisen. An ech mengen, dat ass dat, wat gemaach gëtt. A wann ee se prinzipiell léist, da sinn herno manner där Fäll. An dat ass positiv.

Ech bedauern, datt de Félix Eischen deen Eenzen ass, deen der Médiature an hirem Personal net Merci gesot huet fir déi Aarbecht, déi se maachen!

Zum Schluss wollt ech e Problem opwerfen, deen ech hu mat eiser Prozedur hei. Mir héieren hei zwee Rapporten, mir héieren hei Recommendationen vun der Petitionskommission, wou ech mengen, datt déi meescht Leit sech eens sinn, mä mir maache kee Vote doriwwer. Ech hat mer ee Moment iwwerluecht, ob een net misst eng Motioun maachen, wou een déi Recommendationen vun der Petitionskommission géif engem Vote hei ënnerleeën. Ech hu mer soe gelooss, dat wier net üblech esou.

Mir maachen och kee Vote iwwert de Rapport. Mä meng Suerg ass awer déi, an ech mengen, net nëmmen meng, och déi vu menge Virriedner a vun de Rapportere, ass déi, datt mer déi Recommendationen hei seriö huelen, souwuel als Chamber, datt d'Regierung se seriö hält an och deementspreechend Propositionen mécht. Mä ech sinn iwwerzeegt, datt de Wëllen do ass an datt mer deen och elo confirméiert kréien, mä datt d'Chamber se och seriö hält.

An ech mengen, mir misste mindestens an der Petitionskommission de Suivi maache vun deene Propositionen an deene Recommendationen. Ech hu virdru mam President vun der Kommissioun geschwat, deen och där Meinung ass, datt mir als Petitionskommission, wa mer hei elo kee Vote maachen, eis sollen déi Aufgab ginn, fir dat dote ganz enk ze suivéieren, souwuel wat d'Reform vum Gesetz ugeet wéi och déi aner Saachen, déi mer ouni Gesetzesännerung elo kënnen ëmsetzen, fir datt mer alleguerten op déi Aart a Weis zu der Verbesserung vun der Qualitéit vum ëffentlechen Déngscht a vum Vertrauen an den ëffentlechen Déngscht bäidroen.

Merci.

► **M. le Président.**- Merci och dem Här Turpel. Domat ass d'Diskussion ofgeschloss an d'Regierung huet d'Wuert. Fir d'Regierung schwätzt den Innen- a Fonction-publiques-Minister, den Här Dan Kersch.

### Prise de position du Gouvernement

► **M. Dan Kersch, Ministre de la Fonction publique et de la Réforme administrative.**- Merci,

Här President. Fir d'Eischt wëll ech emol vläicht am Numm vun der Regierung Merci soe fir dee ganz konstruktiven Débat, dee mer hei konnte féieren. An et wäert lech net verwonneren, dass ech als zoustänneg Minister vun der Fonction publique an der Réforme administrative natierlech ganz beréiert si vun deenen Diskussionen, déi hei gefouert gi sinn.

Ech hunn awer och eng ganz konkret Fro gestallt kritt, nämlech déi vum Här Marc Angel. Esou wéi hien et richteg gesot huet, ass et effektiv esou, dass mer opgrond vum Avis amgaange sinn, eng Rei vu Regeln, wat d'Déontologie vun de Statsbeamten ugeet, ewechzehuele vum Niveau vum Règlement grand-ducal a se eropzesetzen op den Niveau vum Gesetz.

Et ass och esou, dass mer an der Chamberskommission eng Sitzung gebraucht hunn, fir eis exklusiv mat deem Thema ausenannerzusetzen. Dat ass also e Froekomplex, deen awer scho relativ komplex ass. An dofir hu mer eis och déi néideg Zäit geholl, fir dat ze maachen. Déi entspreechend Amendementer sinn och elo fäerdeg. De Statsrot kritt se elo an nächster Zukunft oder en huet se scho kritt. An et ass och virgesinn, dass d'Chambre des Fonctionnaires et Employés publics se och sollt kréien, fir sech dann nach zu deem Froekomplex kënnen ze äusseren.

Dann, wat kloer ass, dass mer dann, wa mer dat heiten hunn, eis och nach musse mat der Fro ausenanneretzen, fir e Code oder e Guide de bonne conduite oder de bonnes pratiques - wéi mer et dann och nennen, ech mengen, dat ass net dat Entscheedend -, fir dat kënnen op d'Been ze stellen. Wichteg och do, dass mer déi och brauchen, fir herno d'Evaluatioun vun de Statsbeamten ze maachen, esou wéi dat och an deem neie Gesetz iwwert de Statut vun de Statsbeamte virgesinn ass.

Déi Viraarbecht, op déi mer kënnen opbauen, ass zum Deel, wéi gesot, scho gemaach. Eenzel Verwaltungen schaffen haut schonn no enger „Charte d'accueil et de service «Moien Merci»“. Dir kennt dee Programm. An et gëtt och dee Code, deen och scho vun der Médiature eis recommandéiert ginn ass, fir eis drun ze orientéieren, den „Code européen de bonne conduite administrative“. Wéi gesot, eng grouss Viraarbecht ass an deem Beräich gelescht, wou mer kënnen drop opbauen.

An dëser Fro hu mer also eng honnertprozenteg Eenegkeet, kann ech soen, tëschent Regierung, Chamber an och der Médiature, dass mer esou e Code, Guide och Charte, oder wéi mer et dann och nennen, herno brauchen. Fir mech selwer ass den Titel net esou entscheidend, mä entscheidend ass, dass mer wirklech e Leitfaden hunn, un deem d'Beamte sech kënnen orientéieren, fir och ze wëssen, wat vun hinnen an hirem Déngscht verlaangt gëtt.

Ech wëll och soen, dass ech selwer schonn eng Entrevue mat der Médiature zu deem Thema hat. A mir sinn eis och eeneg am Prinzip, dass mer fir d'Eischt mussen d'Regle vun der Déontologie am Statut geléist hunn, éier mer dann op déi zweet Etapp vun deem Code kënnen iwwergoen.

Ech wollt dann awer nach vun der Geleeënheet profitéieren, fir och engem vun de Rapportere - zwee, dräi Rapportere hate mer, ass gesot ginn -, ech wëll an deem Kontext hinnen och Merci soen. Den Här Schank hat als Rapporteur déi Problematik vun der Germanisierung vun de Virnimmen ugeschwat. En huet gesot, dass mer eis engagéiert hätten, fir do Léisungen ze sichen.

Ech mengen, ech kann haut soen, dass mer eis net nëmmen engagéiert hunn, mä dass mer Léisungen och konkret ëmgesat hunn. 17.000 bis 18.000 Leit, déi alleguerten eenzel ugeschriwwen ginn a mat enger Procédure simplifiée dëse Problem konnte léisen. An och wa mer an dëser sensibeler Problematik nach deen

een oder deen aneren Hickhack an eenzelne Fäll hunn, mengen ech awer, dass déi Mesure, déi mer hei geholl hunn, zur gréisster Zefriddenheet vun de Leit iwwert d'Bühn gaangen ass.

Da wëll ech och nach am Numm vum Premier - Dir wësst, en huet sech entschëllegt, well en elo an enger Audienz beim Groussherzog ass - vläicht dräi kleng Saache soen.

Zur Diskussioun vun der Benennung vun deem Amt, wou mer alleguerte seng Wichtigkeet erkannt hunn, mengen ech, dat ass och hei schonn a verschidde Rieden ugeklongen, gëtt et vill Iddien, vill gutt Virschléi. Déi eng an déi aner kann ee selbstverständlech diskutéieren. D'Regierung ass do op, wëll ech ganz kloer soen, a waart op konkret Virschléi vun der zoustänneger Chamberskommission.

Da wëll ech awer och hei ervirsträchen, dass et an der Tëschenzäit eng verbessert Zesummenaarbecht tëschent Médiature a Premier engerssäits a Regierung, ganzer Regierung anerersäits gëtt, andeems dass d'Médiature regelméisseg e Listing eragëtt vun deenen Ufroen, déi an deenen eenzelne Verwaltungen net an den Délaien beäntwert gi sinn. Dat erméiglecht eis, dee Listing, dann och um Niveau vum Regierungsrot ze diskutéieren an dann an deene jeeweilege Verwaltungen deen néidegen Drock ze maachen, fir dass d'Médiature Satisfaktioun kritt.

A wa mer vu verbesserter Zesummenaarbecht schwätzen, vläicht an deem Kontext wëll ech awer nach eng Kéier drun erënneren, dass och am Regierungsprogramm ugekënnegt ass d'Schafung vun enger Maison des Droits de l'Homme, wou mer u sech ënner engem Daach wëllen d'Servicer vum Médiateur, der Commission des Droits de l'Homme, vum Centre pour l'égalité de traitement a vum Ombudscomité fir d'Rechter vum Kand vereenegen.

Selbstverständlech soll d'Onofhängegkeet vun deenen eenzelnen Institutionen gewahrt bliwen. Mä mir mengen awer, dass d'Schafung vun esou enger Maison du Savoir och kann dozou bäidroen, fir eng ganz Rei vun nützlechen Synergien ze schafen.

Dat gesot, nach eng Kéier villmools Merci fir deen interessanten Débat!

► **Plusieurs voix.**- Très bien!

► **M. le Président.**- Merci och dem Regierungsvertrieeder.

Domat wäre mer um Enn vun eiser Sëtzung ukomm, vu dass mer iwwer näischt ofzestëmmen hunn.

► **M. Dan Kersch, Ministre de la Fonction publique et de la Réforme administrative.**- Pardon!

► **M. le Président.**- Jo?

► **M. Dan Kersch, Ministre de la Fonction publique et de la Réforme administrative.**- Entschëllegt, Här President, ech kréien elo gesot, dass ech mech verschwat hunn. Ech schwätze selbstverständlech vun der Maison des Droits de l'Homme!

► **Une voix.**- Net d'Maison du Savoir.

► **M. Dan Kersch, Ministre de la Fonction publique et de la Réforme administrative.**- An net d'Maison du Savoir!


► **M. le Président.**- Merci fir d'Prezisioun.

Mir sinn um Enn vun eisen Diskussionen iwwert d'Rapporte vun der Médiature ukomm. Eis nächst Sëtzunge si fir den 8., 9. an 10. Juli virgesinn. An ech wollt lech just nach informéieren, dass et elo och offiziell ass, dass mer eng zousätzlech Sëtzung hunn de 16. Juli, also déi Woch drop.

Villmools Merci! Kommt gutt heem a bis d'nächst Woch!

(Fin de la séance publique à 16.24 heures)

- L'actualité parlementaire sur [www.chd.lu](http://www.chd.lu)
- Retrouvez vos députés, tous les textes législatifs et documents parlementaires, les émissions «Chamber aktuell» et les vidéos des séances publiques sur [www.chd.lu](http://www.chd.lu).
- La Chambre et les jeunes: si tu as entre 12 et 25 ans, consulte nos pages 'Junior' sur [www.chd.lu](http://www.chd.lu), avec quiz, information et vidéo.



d'Chamber online op  
[www.chd.lu](http://www.chd.lu)